



ル 5  
2537  
11



門外  
號2537  
卷20-11

日下舊聞卷二十一

郊坰三

彰義金之正西門新城築于明嘉靖中其西門曰廣寧而都人至今以彰義呼之 析津日記

陳文燭都門送別詩落日青絲騎西風白苧詞廣寧

門外柳折盡向南枝 西園集

隋仁壽間幽州弘業寺建塔藏舍利 神州塔傳

隋文帝遇阿羅漢授舍利一囊與法師曇遷數之莫定

多少迺以七寶函致雍岐等三十州州建一塔天寧寺

塔其一也塔高三尋四周綴鐸萬計風定風作音無

斷時寺僧云音歛則光現塔前一幢書體道美亦開皇

中立 京景物畧

卷二十一

昌黎縣志

釋寶巖幽州人住京下仁覺寺守道自娛仁壽下勅召  
送舍利于本州弘業寺卽元魏孝文之所造也舊號光  
林依峯帶澗面勢高敞自開皇末舍利到前山恒傾搖  
未曾休止及安塔竟山動自息又仁壽初歲天降剃刀  
三十三枚用甚鋸利而形制殊別今僧常用以剃剪也  
又初造石函明如水鏡文同碼碯光似琉璃內外照徹  
紫燄光起函外生紋如菩薩像及似衆仙禽獸師子林  
樹雜相非一四月三日夜放大光明照天地有目皆見  
續高僧傳

仁壽二年正月分布舍利五十一州建立靈塔幽州表  
云三月二十六日於弘業寺安置舍利石函始磨兩面  
以水洗之明如水鏡內外相通紫光焰起其石斑駁又

類瑪瑙潤澤炫耀光似琉璃至四月一日起齋行道至  
三日亥時舍利前焚香供養燈光焰庭衆星夜朗有素  
光舒卷在佛輿之上至八日舍利入函自旦及辰函石  
現文彷彿象有菩薩光采粉藻又似衆仙其間鳥獸林  
木諸狀不惑者衆實難詳審其有文理照顯分明今畫

圖奉進

廣弘明集

隋弘業寺唐開元中改額天王寺

長安客話

金大定二十一年改洪業寺爲大萬安禪寺

湛然居士

集

至寧元年八月紇石烈執中作亂入自通元門是日變  
起倉卒中外不知所爲鄯陽石古乃往天王寺召大漢  
軍五百人赴難與執中戰于東華門外

金史本傳

寺當元末兵火蕩盡文皇在潛邸命所司重修姚廣孝退自慶壽曾居焉宣德間勅更今名 長安客語

嘉靖壬寅五月天寧寺塔頂發煙三日 石河小說

嘉靖二十五年給事中李文進言邇年宣武門外天寧寺中廣聚僧徒輒建壇場受戒說法擁以蓋輿動以鼓吹四方緇衣集至萬人瞻拜伏聽晝聚夜散男女混淆甚有違罪黥徒髡髮隱匿因緣為奸故四月以來京師內外盜賊竊發輦轂之下豈應有此乞捕為首者按治其罪詔下錦衣衛捕繫鞫問 國朝典彙

京師天寧寺塔殿門闕處觀之其影倒懸人以為異然沈存中筆談謂凡影入窻隙皆倒懸乃其常理如陽燧照物皆倒中間有礙故也紙鸞飛空中其影隨鸞而移

或中間為牕隙所束則影與鸞遂相違焉東則影西為西則影東樓塔之影中間為牕所束亦皆倒垂與陽燧一也 太岳集

天寧寺塔高二十七丈五尺五寸 艮齋筆記

寺在元魏為光林在隋為弘業在唐為天王在金為大萬安宣德中修之曰天寧正統中修之曰萬壽戒壇名凡數易訪其碑記開皇石幢已失所在即金元舊碣亦無片石矣蓋此寺本名弘業而王元美謂幽州無弘業寺劉同人謂天寧之先不為弘業皆考之不審也 析津

王綬游天王寺次王時彥韻古寺尋幽竟夕暉敗垣芳草路依微鳥啼空院僧何在樹老閒庭鶴自歸靜

對方池移石坐高臨孤塔看雲飛平生自信心無礙  
不是衰年始息機 王舍人集

南大吉天寧寺行城西野寺名天寧遙遙大道臨郊  
坳多土驪駒停玉策諸天魚鑰啟金扇金扇窈窕通  
華殿桂拱璇題皆可見雕銜紫蓋覆珍輪獸吐青蓮  
承寶薦寶薦明珠照四隅修廊廣室紛盤紆參差鐵  
鳳翔高閣琅璫金鐸湧浮圖浮圖萬丈凌遙碧嘉樹  
陰森連廣陌丹青不道千黃金土木寧論雙白壁此  
都此寺真無比誰其建者中常侍可憐海內蒼生心  
只得上方經行地君不見年年四月天傾城車馬紛  
聯翩蘭若上人登寶座沙門佛子坐青氈此時公侯  
亦羅拜神鐘大磬鳴大外螭首作人解誦經朱袍公

子能受戒受戒誦經敝繡筵左廊右室曲相連如陵  
之肉萬鋪錢如澗之酒金杯傳金杯象箸何狼藉蔓  
草叢蘭同一澤薊門艷舞出飛錫燕市名謳調上客  
吁嗟乎中黃門食祿千鍾近至尊胡為崇此孟蘭盆  
瑞泉集

沈淵集天寧寺詩千秋祇苑鳳城西烟樹蒼蒼路轉  
迷縹緲龍宮分色相岩巖麤雁塔逼雲霓齋空竟日聞  
鐘梵坐久深林自鳥啼信是諸天超物外好從此處  
學幽栖 海岳靈秀集

章适天寧寺餞別李伯承詩帝城西畔湧浮圖詞客  
相將興不孤淡界彩煙飛五鳳梵天珠樹下雙鳧論  
交幾駐青絲騎惜別還傾白玉壺江漢才名多秀士

時文采似君無詩統

區大相九日集天寧寺詩帝京重九日朋舊共開尊

地遠城西寺臺高薊北門雲光移塔影山勢斷河源

忽覩南飛雁令余思故園海目集

朱國祚晚過天寧寺詩郭外秋山百里晴日斜深院

晚涼生十三層塔半扉影一鳥不來風鐸鳴介石齋

集

白雲觀元太極宮故墟出西便門一里觀中壘丘真人

像白晳無鬚眉都人正月十九日致醑祠下謂之燕九

節西十餘里為唐太宗哀墓西南五六里為蕭太后

運糧河泯滅無可問矣帝京景物畧

太宗師長春真人姓丘氏各處機字通密號長春子登

州棲霞縣濱都里人金皇統戊辰正月十九日生有日

者相之曰當為神仙宗伯大定丙申年十九辭親居崑

崙山丁亥謁重陽全真開化王真君喜於寧海請為弟

子戊申召見闕下隨還終南山貞祐乙亥金主召不起

已卯宋遣使來召亦不起是年五月太祖自乃蠻國遣

近侍劉仲祿持手詔致聘文曰朕踐前已訪聞先生

博物洽聞探賾窮理干戈而後伏知猶隱山東朕心仰

懷豈不聞渭水同車茅廬三顧之事奈山川懸濶有失

躬迎選差近侍官劉仲祿備輕騎素車不遠千里敬邀

先生不以沙漠悠遠為念五月初一日筆庚辰正月北

行二月至燕欲候駕回朝謁仲祿令從官曷刺馳奏真

人進表陳情表曰登州棲霞縣志道丘處機近奉宣旨

遠召不才自念學道無成老而不死名雖播于諸國道不加于衆人前者南京及宋國屢召不從伏聞皇帝天賜勇智今古絕倫道協威靈華夷率服便欲投山竄海不忍相違且當冒雪衝霜以圖一見蓋聞車駕只在桓撫之北及到燕京聽聞遙遠遂與宣差劉仲祿商議不若且在燕京德興府等處盤桓暫住先令人前去奏知而仲祿不從故自納奏帖伏望皇帝早下寬大之詔詳其可否龍見年三月日奏十月曷刺回復奉勅旨曰成吉思皇帝勅真人丘師省所奏應召而來具悉惟師道踰三子德重多方兩朝屢召而弗行單使一邀而肯起謂朕天啟所以身歸不辭暴露於風霜自願跋涉于沙磧書章來上喜慰何言重念雲軒旣發于蓬萊鶴馭可

遊於天竺顧川途之雖濶瞻几杖以非遙爰答來章可明朕意十四日辛巳十一月至邪迷思干城壬午三月過鐵門關四月達行在所時上在雪山之陽舍館定入見上勞曰他國徵聘皆不應今遠踰萬里而來朕甚嘉焉賜坐就食設二帳于御幄之東以居之約日問道以回紇叛親征不果至九月設庭燎虛前席延問至道真人答以節慾保躬天道好生惡殺治尚無爲清淨之理上悅命左史書諸策癸未乞東還賜號神仙尊大宗師掌管天下道教甲申三月至燕八月奉旨居太極宮丁亥五月特改太極爲長春七月九日頌而逝年八十至元己巳正月詔贈號長春演道主教真人已上見蟠溪鳴道集西游記風雲慶會錄七真年譜等書

丘處機登州棲霞人自號長春子年十九爲全真學於  
寧海之崑崙山與馬鈺譚處端劉處元王處一郝大通  
孫不二同師王嘉金宋二季俱遣使來召不赴歲己卯  
太祖自乃蠻命近臣札八兒劉仲祿持詔求之處機一  
日忽語其徒使促裝曰天使來召我我當往翌日二人  
至處機乃與弟子十有八人同往明年宿雷山北先馳  
表謝拳拳以止殺爲勸又明年使再至乃發撫州經  
數十國地萬餘里始達雪山太祖時方西征日事攻戰  
處機每言欲一天下者必在乎不嗜殺及問爲治之  
方則對以敬天愛民爲本問長春久視之道則告以清  
心寡欲爲要太祖深契其言錫之虎符副以璽書不斥  
其名惟曰神仙歲癸未太祖畋獵于山東馬踏處機請

曰天道好生陛下春秋高數畋獵非宜太祖爲罷獵時  
國兵踐蹂中原河南北尤甚民罹俘戮無所逃命處機  
還燕使其徒持牒招求于戰伐之餘由是爲人奴者得  
復爲良與濱死而得更生者毋慮二三人元史

長春真人雲臥海上天子賜近臣金虎符齋手詔來聘  
仍命使館所歷聽便宜行事太守郊迎縣令前驅驛馳  
數萬里以甲騎五百擁衛其行既入見扈從日久賜還  
衛送如初甘水仙源錄

丘處機赴元太祖召拳拳以止殺爲戒時有事西征則  
云欲一天下在不嗜殺人大獵東山則云天道好生數  
畋獵非宜念兩河流徙則持牒招來全活不下三萬人  
說備



真人丘長春能燒金佐世祖軍國之用以功封以金印  
主全真教草木子

釋有南北宗道自東華少君授漢鍾離權權授唐呂岳  
亦分爲二宗一授遼進士劉操操授宋張伯端伯端授  
石泰泰授薛道光道光授陳枏枏授白玉蟾玉蟾授彭  
耜此南宗也一授金王嘉嘉授七弟子丘處機譚處端  
劉處元王處一郝大通馬鈺鈺妻孫不二世謂之七真  
此北宗也七真之迹皆在東海嶗山而丘處機爲元太  
祖所聘弟子十八人從游漠北居燕之長春宮化焉今  
都城西南白雲觀也穀城山房筆塵  
姚燧長春宮碑長春子丘處機太祖聖武皇帝自奈  
蠻遣近臣持詔求之與語雪山之陽帝之所問師之

所對如敬天愛民以治國慈儉清靜以修身帝大然  
之曰天遣仙翁以寤朕志命左史書其言又勅徐世  
隆載諸靈應之碑牧庵集

姬志真長春真人成道碑大定丁亥重陽真人自陝  
右來真人師之同志有馬丹陽譚長真劉長生于玉  
陽郝廣寧各得所傳重陽既逝真人乃遊秦隴載志  
礮溪大定戊申金世宗徵赴闕特旨住全真堂辛亥  
復居濱都之太虛觀己卯冬赴召及見帝問以長生  
之藥真人曰有衛生之經無長生之藥帝嘉其誠每  
召就坐卽勸帝少殺戮及慈孝之說癸未春勅建長  
春宮仍賜金符其徒得乘傳往還雲山集  
陳時可長春真人本行碑長春子穴居礮溪日乞一

食行則一蓑人謂之蓑衣先生大定二十八年徵赴京師宮建菴于萬寧宮之西召見于長松島進瑤臺第一層曲脊遇至渥翌日遣中使賜上林桃師不食茶果者十餘年矣至是取其一啗之重上賜也已卯之冬成吉思皇帝命侍臣劉仲祿持詔迎師明年春啟行夏四月道出居庸夜遇羣盜皆稽顙以退又明年踰嶺而北壬午四月見皇帝于大雪山之陽明年春住燕京大天長觀繼而行省又施瓊華島爲觀丁亥五月有旨以瓊華島爲萬安宮天長觀爲長春宮六月雷雨大作太液池之南岸崩裂水入東湖聲聞數里魚鼈悉去北口山亦摧師曰山摧池枯吾將與之俱乎七月九日留頌葆光而歸真焉甘水仙源錄

又白雲觀處順堂會葬記長春宗師既逝嗣其道者尹公乃易其宮之東甲第爲觀號曰白雲明年四月除地建址凡四旬堂成榜之曰處順旣祥奉骨以葬求予爲記以會葬者之名氏刻于石之陰或曰昔莊子之將死也弟子欲厚葬之曰恐烏鳶之食夫子也莊子曰在上爲烏鳶食在下爲螻蟻食奪彼與此何其偏也老聃之死也秦侯弔之三號而出曰吾來夫子時也適去夫子順也安時而處順哀樂不能入也道宗者流學老聃者也今長春子之徒以處順名其堂而其師反真之日相與嚴敦匠之事且嗷嗷然哭之哀及至葬大備其禮四方來會者萬人有司衛之以兵甲其厚且備若是是豈老莊之旨乎應之曰吾

書生也試以孔孟之事語子可乎孟子曰昔者孔子  
歿門人治任將歸入揖于子貢相向而哭皆失聲然  
後歸子貢反築室于場獨居三年然後歸今也遊長  
春子之門者既學其道矣能不以墨者之薄葬其師  
又將慎終以遠如子貢之徒何害其為達哉因書其  
事為記同上

王粹長春真人真猗歟長者不可復得三朝推尊才  
學功德閔此兵戈遠涉西北九九乃終世人莫測同

尹志平字太和萊州人受易于郝太古觀長春真人于  
棲霞觀執弟子禮太祖皇帝徵長春真人師勸行北上  
時從者十八人師為之冠代穀尹宗師碑

李志常字浩然觀城人為長春弟子已卯冬詔起長春  
師于東萊從行者十有八人公其一也著西遊記二卷  
玉鶚真常真人道行碑

張志素號谷神子睢陽人長春徵自海真首以好生惡  
殺一言感九重而風四海師始于侍海嶠之遊赴龍庭  
之召迄于環西域之轍稅燕城之駕開關萬里首尾四  
十年未嘗失長春意暫違凡杖孟祺張真師道行碑

潘德冲字仲和齊東人長春高弟一十八人世稱為十  
八大士師其一也從長春西觀還燕克燕京都道錄兼  
領長春宮事徒單公履冲和真人神道碑

夏志誠章丘人已卯國朝遣使召宗師公亦從北行及  
還燕宗師命主玉虛觀事尋提點長春宮姬志真夏真

人道行碑

于志可字顯道寧海人從宗師應詔回處燕京大長春宮由肱順化于白雲觀李鼎冲虛大師于公墓碣

綦志遠字子元掖縣人從長春跋涉萬里見上于西域雪山之陽回車至燕總知長春宮門事李庭曰雲真人綦公道行碑

孟志源字德清其先本徒單氏大定末遷膠水居孟氏宅人因以孟氏稱之聖朝遣便宜劉仲祿起長春于海濱門人中選道行清實可以從行者得十八人公其一也副知長春宮事遷知宮授宮門提舉遷提點李鼎弘道真人孟公碑

按長春子應詔從行至雪山者一十八人其

見于李孟謙所錄者合潘九峯數之僅九人而已

長春宮方丈西有堂曰萃元側有小樓積書萬卷真常李真人以鎖鑰付張志敬恣所窺覽大暢元旨中統三年制曰元門掌教真人張志敬自童子身着道士服志行修潔問學淹該甫踰不惑之年純作難能之事增光前輩垂洽後人可賜號光先體道誠明真人至元二年就長春宮設金錄大醮有羣鶴翔舞下掠壇墀去而復來者累日天子命詞臣作瑞應記刻之碑甘水仙源錄道士申志真字正之太原人嘗為道教提點住京師長春宮舊傳道士十七人坐與釋教持論不勝落髮為僧者志真其一也困學齋雜抄

王粹字子正北平人遇真常北面執弟子禮居長春宮  
之萃元堂嗜讀書作文尤長于詩有陶韋之風 甘水仙  
源錄

張本字敏之觀津人貞祐元年中詞賦高第工大篆八  
分正大九年以翰林學士使北見畱遂隱為黃冠居燕  
京長春宮 同上

虞伯生游長春宮詩序國朝初作大都于燕京北東  
大遷民實之燕城廢惟浮屠老子之宮得不毀亦其  
侈麗瑰偉有足以憑依而自久是故迄今二十餘年  
京師民物日以阜繁而歲時游觀尤以故城為盛獨  
所謂長春宮者壓城西北隅幽迥亢爽游者或未必  
窮其趣而幽人奇士樂于臨眺往往得意乎其間大

德人華春集與孫章周儀之四明袁伯長宣城貢仲  
章廣信劉自謙廬陵曾益初始得登于其宮之閣而  
觀之神京雄據之勢瞭然几席之間於是古昔之疆  
理近代之興廢因得指而論之信可謂奇覩者矣嗟  
夫遠蹈幽隘者無與乎宏達之觀近為世用者何有  
于間曠之適今吾六人者幸生明時以得從事于斯  
也然而簡書責任之所不及適得以其深懷遠志一  
肆夫登臨覽觀之勝豈非天與古之能賦者其有哀  
樂所感必托歌詩以見志茲獨不可相與諷咏以待  
夫後之知者耶况乎人生出處聚散不可常也邂逅  
一日之樂固有足惜者矣豈獨感慨于陳迹而已哉  
乃以蓬萊山在何處為韻以齒敘而賦之得古詩六

首別因仲章所賦倡和又得律詩十有三首粹爲一卷謹敘而藏之

道園學古錄

梁潛同遊長春宮遺址詩序長春宮在北京城西南十里金故城中白雲觀之西也元方士丘真人者與其徒嘗居於此當是時琳宮祕宇儼於王者今其宮既毀獨其遺址存據平陸巍然以高登而覽之猶足以盡夫都邑之勝蓋其東則都城臺闕府庫之壯其南則曠然原陸而薊門高丘之間荒臺遺沼之可見者皆昔者遠與金所嘗經營其間者也其西則西山之崖蒼翠紺碧隱然煙霞之中其北則連山崔巍雄關壯峙凡仕於朝與居于城中者蓋未嘗知唯閒暇登覽於此而後得之也是時皇上親御六師于陰山

大漠之北故凡居守侍從之臣皆優游無事遂相與遊焉既周覽而樂之因又以知夫國都之壯且險誠天府之固也詩曰之綱之紀燕及朋友又曰不懈於位民之攸暨此言人君能振作綱紀勤勞于其上而臣民賴之以安也由是觀之今吾二三人得以恬然嬉遊於此者其誰之力邪夫士君子歡娛盛美之事多在於太平之日而能託之歌詠則有以傳之永久况元之諸賢若虞公邵菴袁公伯長皆嘗臨眺而賦詠焉因以其所分韻蓬萊山在何處爲韻各賦六首同時賦者翰林侍讀鄒緝仲熙曾棨子啟修撰王英時彥王直行儉刑部主事周忱恂如其一人則潛也六人之作見於辭者各不同而其志氣則皆可謂盛

矣既相與錄而藏之因爲之序後之人得而讀之尚  
能想見夫今日之盛也哉

泊菴集

張養浩過長春宮詩往年嘗夢蓬萊宮三山鰲背搖  
虛空增演如視一衣帶銀河鼓浪來天風茲遊良不  
異疇昔半日恂恍迷西東平生頗似有仙分足迹未  
到神先通層樓複觀此誰構只疑天巧非人工繞簷  
松影黑於海步驚棲鶴翔雲中西山亦喜得佳客魏  
峩相向如爭功遼金興廢渺何許今人一笑隣雞重  
須臾遍歷至方丈壺酒盤菓羅青紅已覺破煩  
暑左右况復扇兩童道人見我樂幽勝故爲留戀談  
無窮鼎鑪百沸失膏火風水萬里忘萍蓬默水詩句  
爲相答半醉揮出毫端虹煙雲滿室動鬼神不但爲

彼開盲聾笑談人境兩相稱此會詎與尋常同卻愁  
歸去到塵世又隨俗迹墮樊籠

歸田類稿

袁桷遊長春宮詩珠宮敞殊朶積構中天臺神清歷  
倒景青紅隱蓬萊羣山助其雄袞袞從西來八荒昔  
禹甸爲此增崔嵬舊邑環蟻垤清泉覆流盃雲低落  
日淨莽蒼同飛埃緬懷古僊伯采芝雪絜璫長春豈  
酒國殺氣爲之迴天風起高寒玉珮聲徘徊空餘水  
中輪歷錄環春雷之人去已久松聲有餘哀

清容居

士集

又蒞醮長春宮詩飄飄笙鶴雨絲輕聽徹靈璈曲再  
成玉案香分花有影瑤堦松暝露無聲九枝燈裏開  
真景三素雲中賀太平莫怪錦袍衣袖冷還家從此

羨長生 同上

又游長春宮詩積翠中天下土昏坡陁深處轉金門  
松間不遇采芝客雲裏空憐打麥村華表鶴歸城已  
換滄洲人去柳空存高堂靈骨疑金鑲應許重游得

細論 同上

葛羅祿迺賢長春宮詩羸蹶蹋秋草迢遞謁琳宮松  
子花瓶落溪流板閣通樓臺非下土環珮想高風草

昧艱難日神仙第一功 金臺集

聶大年長春宮詩藥宮琪樹罷棲鸞空有元都太古  
壇野老不尋餐玉訣山人自製切雲冠杖龍化去秋  
池竭笙鶴歸來夜月寒前度劉郎真好事種桃畱與

後人看 東軒集

程敏政過白雲觀詩紅塵飛盡白雲生 一徑深深深草

樹平丹竈已空仙去遠琳宮猶枕舊遼城 筆歌集

陳音九日長春觀作長春宮殿鎖寒煙駐馬斜陽錦

樹邊白鶴不歸雲影外黃花仍發酒杯前 愧齋集

朱國祚題白雲觀詩一言止殺古人難多少通臣藉

爾安辛苦捐軀文信國得歸也擬着黃冠 介石齋集

黃鳳翔遊長春宮故址詩平野敞崇阜寒烟擁榛蕪

凄然孤兔窟曩為真人居琳宮御賜額延訪寵數殊

徒衆聚如林世握黃金符院宇何年頽遺跡猶勝區

我來恣騁眺意與浮雲舒秋風正蕭索懷古一長吁

試問緱山鶴窈茫今有無 黃宗伯集

唇正至元間監醮長春宮見羽士丈室古鏡狀似秋



葉背有金刻宣和御寶四字有感因賦霓裳序中第一詞一規古蟾魄瞥過宣和幾春色知那箇柳鬆花恹曾槎玉團香塗雲抹月龍章鳳刻是如何兒女消得便孤了翠鸞何限人更在天北磨滅古今離別幸相從薊門仙客蕭然林下秋葉對雲澹星疎眉青影白佳人已傾國謾贏得癡銅舊畫興亡事道人知否見了也華髮元詩餘

鍾子髻年百有十四寓白雲觀其人短而鬣髮半白問何以壽曰不娶不多飲不怒不識數日弁州山人稿真常觀長春宮之別院也真常李公所秘因以名之初宮之西正與朝元閣相直可一里所有廢地一區真常偶過其處披荆棘躡瓦礫登北阜之上徘徊久之謂從

者曰此可居也吾他日將老于茲焉暇日除荆棘輦去瓦礫發地而土膏滋鑿井而水泉冽遂葺治蔬圃樹雜木版築未施而真常棄世嗣教誠明張真人繼真常遺意構三清殿九真堂靈官之祠祈真之壇齋堂厨舍又構靜室以居年高不任役者甘水仙源錄

長春丘公來自海上應太祖皇帝之聘越金山而入西域弟子從行者十八人各有科品隸琴書科則真人冲和潘公也及南歸居燕歲壬辰廣陽坊居民有貨其居者潘公買之以爲長春別館建正殿翼以左右室築琴臺于殿之陰金有名琴二曰春雷曰玉振皆在承華殿貞祐之變玉振爲長春所得命公蓄之故以名其臺觀成以清逸名之潘公自號九峯老人同上

廣恩寺遼之奉福寺也在白雲觀西南地名栗園按遼史南京有栗園蕭韓家奴嘗典之疑卽此地也土人目寺爲三教寺中有石幢題曰守司空幽國公中書令奉爲故太尉大師特建佛頂尊勝陀羅尼幢記講僧真延撰并書末云清寧九年歲次癸卯七月庚子朔十三日壬子記幢南有碑正統初太監僧保錢安立析滄日記太康十年正月復建南京奉福寺浮圖遼史道宗紀遼佛頂尊勝陀羅尼幢記京師奉福寺懺悔主崇祿大夫檢校太尉純慧大師之息化也附靈塔之巽位樹佛頂尊勝陀羅尼幢廣丈有尺門弟子狀師實行以記爲請大師諱非濁字貞照俗姓張氏其先范陽人重熙初禮故守太師兼侍中圓融師爲師居無

何嬰脚疾乃逕匿盤山敷課于白織蓋每宴生誦持常有山神敬侍尋克痊八年冬有詔赴闕興宗皇帝賜以紫衣十八年勅授上京管內都僧錄秩滿授燕京管內左街僧錄屬鼎駕上仙驛徵赴闕今上以師受眷先朝乃恩加崇祿大夫檢校太保次年加檢校太傅太尉師搜訪闕章聿修睿典撰往生集二十卷進呈上嘉贊久之親爲幟引尋命龕次入藏清寧六年春鑿輿幸燕回次花林師侍坐于殿而受燕京管內懺悔主菩薩戒師明年二月設壇于本寺載受之徒不可勝紀九年四月示疾告終于竹林寺卽以其年五月移窆于昌平縣司空幽國公仰師高躅建立寺塔并營是幢庶陵壑有遷而音塵不泯清寧九年

五月講僧真延撰并書

勅賜廣恩寺碑北京西南去都城五里有奉福寺中建殿曰大慈殿之前曰天王殿左曰文殊右曰普賢殿後為無量壽佛左右殿二左奉大梵尊天右奉帝釋尊天四周翼以長廊天王殿之前左右為樓以置鐘鼓中為碑亭又前為金剛殿廊之東為齋堂為厨為庫廊之西為禪堂為茶房廊之東西隅俱為方丈其齋堂禪堂以南皆為僧房肇于宣德十年冬十月至正統二年二月告成上聞賜名廣恩寺方辟土得白金五錠重二百六十兩以資工費復得巨石一方于西南隅地中遂以為碑太監僧保錢安識

南京栗園司典南京栗園

遼史百官志

蕭韓家奴為右通造典南京栗園帝嘗從容問曰卿居外有異聞乎對曰臣知炒栗小者熟則大者必生大者熟則小者必焦使大小均熟始為盡美不知其他帝大笑遼史本傳

真空寺在廣寧門外明景泰中建正德年圯世宗入繼大統羣臣迎于郊外帳殿駐于寺之西太監李某捐金修之大學士張治撰碑寺後有古松二其一已枯析津日記

萬曆六年六月大學士張居正抵京上賜宴于真空寺神宗實錄

陸可教夏日出郊憇真空寺詩古刹闕相遇西郊日才曛一燈僧自定諸界鳥空聞松影禪房合煙光驛

道分更憐歸路晚馬足有殘雲 金華詩萃

高道素息真空寺壁詩真空寺後雙松樹曾見先皇

駐蹕初三讓豈宜臨便殿百年猶共識遺墟離筵慣

聽悲歌續佛火偏存浩劫餘高坐道人無恙在願聞

第一義何如 景元堂集

十里村見元人何太虛詩當在彰義門外今莫知其處

新津日記

何中宿十里村詩朝出順承門暮宿十里村竹鷹獵

騎歸積雪明郊原居人喜客來汲井隣墻温羹湯稍

暖熱餅餌亦燒燐此夕羈旅意深知路人恩重林隱

城堞望此勞心魂 知非堂集

哀忠墓在江西南相傳唐太宗見臨煬帝征遼所亡士

卒骸骨惻然憫之令悉收葬為一大冢因名 明一統志

義井菴在天寧寺西十里復十里至盧溝橋義井或曰

蜜井相傳文皇駐蹕甘其泉故名菴為中涓所修初勅

寶閣高入雲漢中范丈六金身稱之 長安客話

元太保劉秉忠墓在盧溝橋北墓前石獸尚在或云太

保與其弟秉恕墓俱在邢臺縣嘉靖中為盜李淮等所

發壙石盡勒諸盜名官驗得之按名捕盜無得脫者 同上

姚廣孝春日謁劉太保墓作芳時登壠謁藏春兵後

松楸化斷薪雲暗平原眠石獸雨荒深隧泣山神殘

碑蘚蝕文章舊異代人傳姓字新華表不存歸鶴怨

幾多行客淚沾巾 逃虛子集

袁琪詩橋南橋北數家村水遶山迴到墓門此日英靈何處在獨留華表對黃昏

柳莊集

宋本墓在城西三十里撇山村元翰林待制謝端撰銘

寰宇通志

玉河廢縣在府西四十里本薊縣地五代時劉仁恭置

方輿紀要

玉河縣本泉山地劉仁恭于大安山創宮觀師煉丹移化之術于方士王若訥因割薊縣分置以供給之

遼史

盧溝河南過長店岡而西有縣村疑即古玉河縣故址然唐時幽州管內尚有廣平縣亦分薊州置者所謂縣村究未定為何縣也

國門近游錄

夕月壇在阜成門外繚以垣墻嘉靖九年建東向為制

一成祭用牲玉獻舞如朝日儀惟樂六奏從祀二十八宿木火土金水五星周天星辰壇方廣四丈高四尺六寸面白琉璃階六級俱白石內靈星門四東門外為座池東北為具服殿南門外為神庫西南為宰牲亭神厨祭器庫北門外為鐘樓遣官房外天門二座東天門外北為禮神坊護壇地三十六畝祭之日以寅祭之時以亥

春明夢餘錄

夕月壇每三歲一親祭以丑辰未戌年行事朝日則遣文臣夕月則遣武職

嘉靖祀典

秋分祭夜明于夕月壇夜明之神東向二十八宿之神周天星辰之神木火土金星之神南向夜明之神位版黃地素書五星二十八宿周天星辰之神俱綠地金

字同上

衍法寺有勅建碑順天府志

資福寺明正統間僧圓昇建至嘉靖初尚膳監太監馬潮修之中有山西按察司僉事督理宣府邊儲四明錢俊民碑書之者禮部左侍郎任丘李時也殿前梵塔上勒片石有壬寅三月三日字未知何時所建涿水亭雜識

慈慧寺去平則門僅二里萬曆間蜀僧愚菴所創寺中梅檀金像乃黃太史輝手自撥蠟精工特甚寺碑陶太史望齡撰文黃太史書丹外有蜘蛛碑甘井碑金剛塔碑並稱能品長安客話

慈慧寺成于萬曆壬寅周匝列大樹墻百堵砌以亂石

隨其後角曰虎皮墻寺後有閣供梅檀佛黃南克輝手定坯范寺有蜘蛛塔碑甘井碑金剛塔碑皆南充書蜘蛛塔者南克誦金剛經次一蜘蛛緣案上正中立向佛而伏驅之盤跚復來就前位南克曰聽經來耶誦經終卷蜘蛛寂然舉而視之遺蛻耳以沙門法龕而塔之帝京景物畧

慈慧寺後不二里有靜樂堂其墻陰皆宮人葬處所謂官人斜也長安客話

古葬宮人之所謂之官人斜京城阜成門外五里許有靜樂堂磚甃二井屋以塔南通方尺門謹閉之井前結石為洞四方通風宮人有病非有名稱者例不賜墓則出之禁城後順貞門傍右門承以殮具昇出元武門經

北上門北中門達安樂堂授其守者召本堂土工移北  
安門外易以朱棺禮送之靜樂堂火葬塔井中凡宮人  
故必請旨凡出必以銅符合符乃遣嘉靖末有貴嬪捐  
貲易民地數畝其焚燼不願井者悉內地中

菊隱紀聞

蔣山卿出西直門望西山詩路出西郊外尋幽興已  
賒徑迴迷落日林合隱疎花山色爭迎馬湖光欲泛

槎翠微多少寺處處足烟霞

南泠集

齊園在西直門稍右園盡則高粱橋矣園中海棠甚多  
西鑿一曲欄引橋下水灌之上作板橋亭邊有叢竹

燕

都遊覽志

高粱開在西直門外迤北一里至元二十九年建名西  
城開

水部備考

高粱河離西直門僅半里橋跨河上茲水源發西山匯  
為西河東為小渠由此入大內稱玉河水急而清魚之  
沉水底者鱗鬣皆見橋北精藍甚置歲四月八日為浴  
佛會四方來觀肩摩轂擊浹旬乃已

長安客話

高粱橋疎柳沿溪岸依依有江南之色

寓林集

過高粱橋楊柳夾道帶以清流洞見沙石佛舍傍水結  
構精密朱戶粉垣隱見林中者不可悉數

珂雪齋集

水從玉泉來三十里至橋下夾岸高柳絲垂到水綠樹  
紺宇酒旗亭臺廣畝小池陰爽交匝歲清明日都人踏  
青輿者騎者步者游人以萬計浴佛日重午游亦如之

帝京景物略

蘄東一十里有高粱之水

魏氏土地記

濕水又東南高粱之水注焉水出薊城西北平地泉東注經燕王陵北又東逕薊城北又東南流入濕水俗諺云高粱無上源清泉無下尾蓋以高粱微涓淺薄裁足津通憑藉涓流方成川晰清泉至潞所在枝分更爲微津散漫難尋故也水經注

大城東門內道左有魏征南將軍建城鄉景侯劉靖碑晉司隸校尉王密表功加于民宜在祀典以元嘉四年九月二十日刊石建碑碑云魏使持節都督河北道諸軍事征北將軍建城鄉侯沛國劉靖字文恭登梁山以觀源流相原隰以度形勢嘉武安之通渠美秦民之殷富乃使帳下督丁鴻軍士千人以嘉平二年立渴於水道高粱河造戾陵過開車箱渠其過表云高粱河水者

出自并州黃河之別源時長岸峻固直截中流積石龍以爲主過高一丈東西長三十丈南北廣七十餘步依北岸立水門門廣四丈立水過長十丈山水暴戾則乘過東下平流守常則自門北入灌田歲二千頃凡所封地百餘萬畝至景元三年辛酉詔書以民食轉廣陸廢不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤合四五百里所灌田萬有餘頃高下孔濟原隰底平疏之斯澗決之斯散導渠口以爲濤門灑漉池以爲甘澤施加于當時敷被于後世晉元康四年君少子驍騎將軍平鄉侯弘受命使持節監幽州諸軍事領護烏丸校尉寧



朔將軍遏立積三十六載至五年夏六月洪水暴出毀  
損四分之三剽北岸七十餘丈上渠車箱所在漫溢追  
惟前立遏之勲親臨山川指授規畧命司馬關內侯逢  
憚內外將士二千人起長岸立石渠修立遏治水門門  
廣四丈立水遏五尺興復載利通塞之宜準遵舊制凡  
用功四萬有餘焉諸部王侯不召而自至繼負而趨事  
者蓋數千人詩載經始勿亟易稱民忘其勞斯之謂乎  
於是二府文武之士感秦國思鄗渠之績魏人置豹祀  
之義乃遐慕仁政追述成功元興五年十月十一日刊  
石立表以記勲烈并記遏制度永為後式焉同上  
斛律羨轉使持節都督幽平營東燕六州諸軍事幽州  
刺史導高梁水北合易京東會于潞因以灌田邊儲歲

積轉漕用省公私獲利焉北齊書本傳

遼乾亨元年七月耶律沙等及宋兵戰于高梁河小郤  
耶律休哥斜軫橫擊大敗之遼史景宗紀  
承安三年命勿毀高梁河牖從民灌溉金史  
至順三年三月以帝師汎舟于高梁河調衛士三百挽  
丹元史文宗紀

顧起元高梁橋詩步履循堤柳東風雪正消青園山  
入寺綠漲水平橋密樹藏鶯久輕絲冒馬遙誰能在  
朝市偃仰過花朝真草堂集  
陸啟宏高梁橋作冬郊未經雪殘葉猶戀樹山水入  
高梁淙淙橋下度萬物靜相忘豁然領奇悟及此見  
夙心斜陽忽西暮賁山房詩集

朱茂晒清明日過高梁橋作高梁河水碧彎環半入  
春城半繞山風柳易斜搖酒幔岸花不斷接禪關看  
場壓處掉都盧走馬跳丸何事無那得丹青尋好手  
清明別寫上河圖 石門遺藁

至元七年建大護國仁王寺于高梁河十一年三月寺  
成十六年八月置大護國仁王寺總管府二十二年正  
月發諸衛軍六千八百人給護國寺修造 元史世宗紀

大德五年正月奉安昭睿順聖皇后御容于護國仁王  
寺 元史成宗紀

至治三年十一月勅會福院奉北安王那木罕像于高  
梁河寺 元史泰定帝紀

虞集劉正奉塑記至元七年世祖皇帝始建大護國

仁王寺嚴梵天佛像亦奇工爲之得劉正奉於黃冠  
師正奉先事青州祀道錄傳其藝及被召又從阿尼  
哥學西天梵相神思妙合遂爲絕藝凡兩都名利有  
塑土範金搏換爲佛者一出正奉之手天下無與比  
由是上兩賜宮女爲之妻又命以官長其屬迄今四  
十餘年凡行幸無所不從今上皇帝尤重象教嘗勅  
正奉非有旨不許擅爲人造神象其見貴異如此正  
奉名元字秉元薊之寶坻人年七十矣其官曰昭文  
館大學士正奉大夫秘書監卿 道園學古錄

又大護國仁王寺恒產之碑初至元七年秋昭睿順  
聖皇后於都城西高梁河之濱大建佛寺三年而成  
時裕宗在東宮襄善贊美所以奉慈闈尊梵王弘法

海之盛心無所不用其極以佛汰不徒行必依於人  
人不可以無食中宮乃斥糶營產業以豐殖之已  
而効地獻利者隨方而至物衆事繁建總管府統於  
內置提舉司提領所分治於外歲滋月積府之政日  
以懈田失故額租賦不登寺之基日以削至大元年  
皇太后翼扶明聖慨然思述祖宗之德念昭睿順聖  
經始之仁罷總管府建會福院以平章政事宣政院  
使安普忽馬兒不花爲會福院使綜核名實遣官分  
道約部使者集郡縣吏申畫疆場樹戩討珍歷四載  
始仍舊貫視常歲之入相倍蓰焉凡經隸本院若大  
都等處者得水地二萬八千六百六十三頃五十一  
畝有奇陸地三萬四千四百一十四頃二十三畝有

奇山苻河泊湖渡陂塘柴葦魚竹場二十九玉石銀  
鐵銅鹽硝礬白土煤炭之地十有五粟爲株萬九千  
六十一酒館一隸河間襄陽江淮等處提舉司提領  
所者得水地萬三千六百五十一頃陸地二萬九千  
八百五頃六十八畝有奇江淮酒館百有四十湖泊  
津渡六十有一稅務關埧各一內外人戶總三萬七  
千五十九實賦役者萬七千九百八十八殿宇爲間  
百七十五靈星門十房舍爲間二千六十五牛具六  
百二十八江淮牛之隸官者百三十有三經界旣正  
版籍旣一皇帝以爲能稱孝養意進封女普泰國公  
辭上曰爾逮寧世祖乃累朝舊臣封以此毋庸辭出  
制書親授之皇太后樂其有成功也命詞臣文勒

石以垂永久嗚呼一寺之政必得其人乃舉况天下之大四海之衆乎同上

巡河廠在高梁橋稍西門外臨流內環以渚水東西兩軒東可待月西則諸山濃黛涵浴水光中中貴多於此游觀燕都遊覽志

廣通寺在巡河廠北崇基若一岡阜累級而升寺門前繚以短垣寺四角有高樓可以眺望亦春遊一勝地同上

廣通寺元之泐王寺也內有二碑皆嘉靖中大學士華亭徐階所撰餘姚李木書成國公朱希忠篆額碑稱寺係至元間本刹住持貴吉祥建至明更額廣通內官監太監田用御馬監太監梁經修之燕都游覽志謂崇之

若岡阜累級而升今去周行止二三尺耳滌水亭雜識

極樂寺門外有二柳高拂天長條踈地可掃馬蹄寺中

有松亦佳燕都游覽志

極樂寺去高梁橋三里馬行濃綠中若張蓋殿前有松數株松身鮮翠嫩黃斑剝若大魚鱗可七八圍瀟碧堂集

寺臨水有垂楊婀娜甚殿前四松遮蔭不見一人寺左凶花堂花已凋殘惟存故畦耳堂左有三層樓望西山惜樹封之燕都游覽志

寺成化中苑中有牡丹園春日游屐恒滿園有高樓萬曆壬辰進士曠鳴鸞欲登之寺僧辭以久局不便開曠不聽甫登樓火發曠與樓俱燼春明夢餘錄

大真覺寺在極樂寺西門有金剛座上置五小座藏如來金身永樂間西域中印土僧所獻規製前此未有也寓林集

真覺寺浮圖高五六丈許而上為塔五方陟其頂山林城市之勝收焉緜山集

真覺寺原名正覺寺乃蒙古人所建寺後一塔甚高名金剛寶座從暗竇中左右入蝸旋以躋于顛為平臺臺上湧小塔五座內藏如來金身金剛座之左又一浮屠傳是憲宗皇帝生葬衣冠處前臨橋橋臨大道夾道長楊綠陰如幕清流映帶尤可取也燕都游覽志

成祖文皇帝時西番板的達才貢金佛五軀金剛寶座規式詔封大國師賜金印建寺居之寺賜名覺成化

九年詔寺準中印度式建寶座累石三五丈藏級一壁左右蠟旋而上頂平為臺列塔五各二丈塔列梵字梵寶梵華塔前有成化御製碑帝京景物畧

真覺寺塔規制奇寺有姚夔碑記永樂中西師五明板的達召見于武英殿帝與語悅之為造寺石室則成化九年所建也析津日記

明憲宗皇帝御製真覺寺金剛寶座記畧永樂初平有西域梵僧曰板的達大國師貢金身諸佛之像金剛寶座之式由是擇地西關外建立真覺寺創治金身寶座弗克易就于茲有年朕念善果未完必欲新之命工督修殿宇創金剛寶座以石為之基高數丈上有五佛分為五塔其丈尺規矩與中印土之寶座

無以異也成化癸巳十一月告成立石

朱衡真覺寺五塔詩勝地塵埃少中天洞壑孤雲樞

歛縹緲風澄入虛無檻外三天界尊前五岳圖何當

探慧鏡一為照迷途嶺山集

何棟登真覺寺浮圖詩凌空垂寶塔披霧出銅盤影

照青蓮色光寒白露團霞標窺日近風洞洩雲寒靜

坐觀空界天花遶石壇太華集

嘉興觀在阜成門稍北而西逕路兩傍多樹自此王雙

峯寺北通白石橋觀有小閣絕高西即利瑪竇墳燕都

游覽志

白石關西至青龍關二十里至元二十九年建水部游

考

鎮國寺在白石橋順天府志

致和元年三月命僧千人修佛事于鎮國寺元史泰定

帝紀

駙馬都尉萬公白石莊在白石橋稍北臺榭數重古木

多合抱竹色蔥蒨盛夏不知有暑附郭園亭當為第一

燕都游覽志

萬駙馬白石莊有爽閣鬱岡軒翳月池帝京景物畧

劉榮嗣白石莊萬都尉園作仙圃宜秋色相將戀夕

曛松青新濯雨槐古舊侵雲竹牖池光合山樓石翠

分鳳簫遺韻左擬向月中聞半舫集

延壽菴在白石橋西二里殿宇精嚴其後高樓九楹左

右翼樓各五楹一啟西窻嘉木織蘿紛歎翳蒼西山隱

下等月

卷二十一

三

映若以翠屏圍之

萬曆四年西竺高印土僧左吉古魯東入中國初息天寧寺後過阜成門外二里溝見一松盤覆跌坐其下默持陀羅尼咒匝月不食僧耳環手鉢紅鬚衣蒼紫面而髯鬚肖古達摩相畢長侍奏之賜織金禪衣為建寺曰西域雙林寺殿供三大士西番變相也寺後一土山山前一塔傍多朱櫻帝京景物畧萬曆初大璫馮保營葬地造寺曰雙林雙林馮之別字也穀城山房集

于慎行雙林寺歌道旁佛宮誰者築珠樓寶殿橫山麓僧徒指點為予說此寺方成主人逐憶昨十載氣薰天吐納日月下雲煙外延和引三公勢內禁親操

六璽權出入鈎陳爾筦鑰笑談甲觀走金蟬建寺平侵貴主地施僧直請大官錢輸來多寶堆成塔輦盡黃金布作田汰官梵宇何連曼勝地名區看不斷墓上林園學九陵祠前樓閣成雙觀落成牛酒國親供建醮香花天女獻吁嗟此寺猷渺小赤刀已欲盈千萬我皇神威符世祖距晚大奸俯地取郭家金穴入水衡鄧氏銅山歸少府盧兒解玉乞街衢宅婦懷簪隨卒虜惟餘此寺在郊原虹梁綺構誰為主蛛網空懸梵鐸風青苔自鎖玲琅雨盛衰轉盼那不有幾年翻覆看如許君不見江陵滅頭土三尺若教餒鬼不來食一代賢豪此謂何爾全首領恩已極同上

馮琦雙林寺歌長安春風能幾許陣陣化作秋來雨

蒼狗白衣那可辨古今榮瘁寧堪數君不見元明宮  
君不見雙林寺雙林寺主跡如掃路人猶說繁華事  
憶昔金貂近帝樞轉日回天傾上都九列有時闕進  
退五侯無敢同馳驅縱橫五鹿客交結霍家奴城中  
甲第連白虎城外浮圖下赤烏浮圖矯矯凌雲際乘  
豹駝狸鬪神異天中畫棟盤龍螭階下豐碑踞鼉  
天子親爲降勅書宰相不惜書名字布金刻玉神亦  
妨釁血塗膏鬼所忌從來執權如抱虎黃鉞一下無  
處所半夜雷霆飛赤霄百萬金錢歸少府罪厚難徼  
帝釋靈譴輕未霽君王怒大第深沉別有人野寺淒  
涼已無主試看今日蓬與蒿試看舊日石與牢豪華  
意氣竟何在寂寥樓臺空復高黃金臺前車已覆黃

金塢中滿已撲何處流人泣向隅何人貴近欣當軸

一度花開一度春一年世事一回新惟有寺前松柏

樹年年長對往來人

北海集

興教寺在雙林寺東成化二十一年是以居大興法王

結幹領占者

帝京景物畧

至元七年二月築昭應宮于高梁河

元史世祖紀

大德五年二月賜昭應宮地百頃

元史成宗紀

昭應宮在雙林寺西元至元中建龜蛇兆焉正德八年

修蛇復馴出赤質黑章金文爛然大學士費宏碑文記

之

帝京景物畧

馬中錫過昭應宮詩翠濕松梢露滴珠洞門下馬獨  
踏丹成勾漏知何在花發元都恐未如游客漫勞



題鳳字道人不喜換鶯書分明也住人間世偏自相逢說步虛

東田漫稿

雙林寺西二里有神虎橋橋四石虎萬曆中一虎夜逸

遂名三虎橋

帝京景物畧

大佛寺在西直門北三里寺後有高阜積土甃石爲之廣袤幾二里山上有真武祠踏青士女正月必先至其地

燕都游覽志

明正德癸酉司禮監太監張雄建寺于宛平縣香山鄉畏吾村賜額曰大慧并護勅勒于碑寺有大悲殿重簷架之中範銅爲佛像高五丈土人遂呼爲大佛寺嘉靖中太監麥提督東廠於其左增蓋佑聖觀於是合寺觀計之殿宇凡一百八十三楹拓地四百二十一畝蓋是

時世宗方信道士而厭繼流內官惟恐寺糾之毀故建道觀於其旁而寺後之山又有真武祠藉此以存寺也寺之始建大學士茶陵李東陽爲碑工部尚書湯陰李鏊書之新寧伯譚祐篆額其增置佑聖觀也大學士餘姚李本撰文禮部尚書高安吳山書之成國公朱希忠象額其後萬曆壬辰重修則太子太保禮部尚書太倉

王錫爵撰記

涿水亭雜識

李東陽墓在城西畏吾村

順天府志

西涯墓在北京城外其家族姓漸微至以墓前白石碑搗碎與販鹽者揀和以賣吁可慨也

瓦釜漫記

出真覺寺循河五里玉虹偃臥界以朱欄爲廣源開俗稱豆腐閘卽此閘引西河水東注深不盈尺宸游則階

水滿河可行龍舟綠溪雜植槐柳合抱交柯雲覆溪上  
為龍舟駐處每通惠河水涸糧運不前則遣官於此祭  
禱請水焉 長安客話

廣源開在西直門西七里至元二十六年建 水部備考

英廟文宗兩朝御舟藏廣源開上別港 燕石集

何御廣源開望西山詩山水有佳趣景象在朝墩晨  
倚河隄望曠然盡平原春榦寂已歇秋容榮復繁疏  
峯互對立叠澗迅相奔行人穿露薄樵子出烟村陟  
嶺遂及巔派流得窮源詎詢世外樂聊辟區中喧 白湖集

萬壽寺在廣源開西數十武殿宇極其閎麗寺左鐘樓  
前臨大道鐘鑄自文皇徑長丈二內外刻佛號彌陀法

華諸品經蒲牢刻楞嚴咒銅質精好字畫整雋相傳為

沈度筆少師姚恭靖公監造近年自宮中移此擊之聲

聞數十里有山亭在佛閣後可結趺坐 長安客話

萬曆五年三月建萬壽寺于西直門外七里先是京師  
有番經漢經二廠年久頽圯穆皇帝重修未竟上移貯  
漢經於此中其正殿曰大延壽閣曰寧安重樓複榭隱  
映蔽虧寺後壘石為三山以奉西方三大士蓋象普陀  
清涼峨嵋凡山地四頃有奇浹歲即成時司禮監大璫  
馮保領其事先助萬金潞邸及諸公主妃嬪以至各中  
賁無不捐貲其藻繪丹雘視金陵三大刹不啻倍蓰 野獲編

萬壽寺在真覺寺西二里神宗朝勅建丹樓紺宇幾與

大內等蓋上幸山陵嘗爲駐蹕地也方丈築山上有廣榭下峙小亭寺僧云先帝曾於此尚食後有圃數頃賜出萬石大鐘乃太宗時製昔懸于樓邇年有訛言帝里白虎分不宜鳴鐘者遂臥鐘于地

燕都游覽志

萬壽寺在廣源闡之西萬曆五年太監馮保奉命作中大延壽殿五楹旁羅漢殿各九楹後藏經閣高廣如中殿左右韋馱達摩殿各三楹方丈後輦石爲山所取土處爲三池山上三大士殿各一三池共一亭山後圃百畝寺碑大學士張居正奉勅撰先是文皇帝鑄大銅鐘內外書華嚴八十一卷銑于間書金剛般若三十二分向藏漢經廠於是勅懸諸寺日俾六僧擊之天啟中

不復擊臥地上 帝京景物畧

朱國祚萬壽寺詩貝葉三車少華鐘萬石餘聲仍到長樂地合置精廬瀟灑人王界莊嚴學士書秋來霜落後流響更何如

介石齋集

張居正勅建萬壽寺碑今上踐祚之五年聖母慈聖宣文皇太后出帑儲命司禮監太監馮保卜地于西直門外七里廣源輝之西特建梵刹爲尊藏漢經香火院中爲大延壽殿五楹旁列羅漢殿各九楹前爲鐘鼓樓天王殿後爲藏經閣高廣如殿左右爲韋馱達摩殿各三楹修簷交屬方丈庖福具列又後爲石山山之上爲觀音像下爲禪堂文殊普賢殿山前爲池三後爲亭池各一最後果園一頃標以雜樹環以護寺地四頃工始于萬曆五年三月竣于明年六月

以內臣張進立寺事賜名曰萬壽 太岳集

鄭公莊在萬壽 並左度橋而南有亭在平疇亭外俱稻

田淥隄蓮芡蓋 購燕婉園也 燕都游覽志

燕都游覽志

燕都游覽志

日下舊聞卷二十一 萬壽終

里與耶

或出塔

我萬壽

更何收

燕都游覽志

燕都游覽志

日下舊聞卷二十一 補遺

郊坳三

李夢陽天寧寺觀塔碑作舊瞻天寧塔今覽天寧寺

茲塔多鬼怪光芒夜夜至不知何時殿結構今頽棄

別蘇讀其碑識是隋文季蝌蚪半剝落蛟龍猶異屬

我來值時暮攬遊發潛喟修陸抗趙代長山衛燕薊

蒼然野眺合一灑楊朱淚 空同集

大都長春宮即舊太極宮也 山中白雲詞

張炎憶舊遊詞看方壺擁翠太極垂光積雪初晴聞

闔開黃道正綠章封事飛上層青古臺半壓琪樹引

袖拂寒星見玉冷閒坡金明遂宇人住深清 幽尋

自來去嘆華表千年天籟無聲別有長生路對花開

花落何處無春露臺深鎖丹氣隔水喚青禽尙記得  
歸時鶴衣散影都是雲

孫樓郊西詩上苑春偏麗西郊更可憐輕塵花半妥

斜陌柳初眠綠樹鶯聲外青山馬首前夕陽南北淀

彷彿太湖田 百川集

梵僧似喃嚶結能為漢音詰其西來踐歷蹤山云其國

名主活迺高昌出家法藏寺本周天元時甘露梵王刹

東行九萬餘里始達五臺山逢御馬監太監劉潤引至

北京雙林寺住萬曆三十年明肅皇太后命住萬壽菴

又三年番經廠太監張貴引奏命住雙林寺賜紫衣寶

冠命西經廠掌壇教授中貴又賜織金禪衣金段膳盒

等物 明齋筆記

白雲觀西六里羊坊店市西有崇壽寺創于明正德癸

酉司設監監正劉允乘所建寺臨官道山門內正殿三

楹東西廊各三楹殿前碑二一為吏部右侍郎兼翰林

院學士國史副總裁西蜀溫仁和撰文武定侯郭勛篆

額南京兵部尙書喬宇書一為柱國少師兼太子太師

吏部尙書謹身殿大學士鉛山費宏撰文惠安伯張偉

篆額戶部尙書無錫秦金書 行國錄

普會寺遼之駐蹕寺也在阜成門外玉河鄉池水村嘉

靖甲寅御馬監太監蔡秀恭重建土人呼其地為蔡公

店殿前石幢一書大佛頂尊勝陀羅尼後題大朝歲次

己酉年十一月十七日宣差濱棣大使張鉢信順建王

府下斷公事官普元奴立未詳時代又嘉靖三十六年

一碑濮陽李廷相文昌黎王槐書鐵鐘一隆慶二年四月造殿後松一本極蒼古意遼時所植也松下石幢一上鐫沙門奉航塔記

詠歸錄

遼駐錫寺沙門奉航禪記師諱奉航俗姓李氏涿水新城縣渠村人幼入緇門訪道尋師就至燕京左街駐蹕寺禮祥玉上人為親教焉清寧元年受具自後負笈遊方復歸本寺辦修殿宇大安五年涿州惠化寺請為提點壽昌二年秋九月京北花嚴寺請為提點乾統八年四月遷化于駐蹕之本院門弟子善堅葬之祖師塋側刻石為塔波述師實行焉

崑川謹按遼史紀年祇有壽隆而無壽昌是碑書隆作昌未得其詳也

延祐二年禮部尚書元明善代丞相禱雨長春宮孫真人德彧曰明日雨微至須丞相上章自言憂民報國之意小得雨尚書即為章往白丞相丞相病在臥內使人取章入署名付還真人一見告尚書曰章觸婦人手且得罪寧敢望雨乎使人問丞相門下果然乃拜伏請罪久之退齋宮俟命夜半真人曰上帝念民無辜賜之雨三日果雨三日

道園學古錄

元宮人王金蓮晚為道士提點昭應宮卒贈淵靜元素真人

查浦輯聞

萬曆己未夏予與崑山顧錫疇九疇華亭董象恒臣棊過極樂寺柳陰結軌命酒賦詩予詩有連空碧草皆游幕到處垂楊作酒筵之句九疇極為賞擊詩不足傳俊

游則不易得也

天王寺之更名天寧也宣德十年事也今塔下有碑勒  
更名勅碑陰以正統十年刊行藏經勅一碑後有尊勝  
陀羅尼石幢遼重熙十七年五月立輿志

京師天寧寺塔建于隋開皇末規制特異實其中無階  
級可上蓋專以安佛舍利非登覽之地也其趾爲方臺  
廣袤各十二丈高可六尺繚以周垣南北有門鐫之臺  
上爲八觚壇高可四尺象如黃琮塔建其上觚如壇之  
數塔之趾畧如佛座雕刻錦文華葩鬼物之形上爲扶  
闌闌四周架鐵燈三層凡三百六十蓋每月八日注油  
然之闌之內起八柱纏以交龍墻連于柱四正琢爲門  
夾立天王像四隅琢爲臚夾立菩薩像皆陶甃爲之仰

望者疑爲燕山奪玉石也自塔趾至柱楣爲第一層其  
高約全塔三分之一自是以上飛檐疊栱又十二層每  
椽之首綴一鈴八觚交角之處又綴一大鈴通計大小  
鈴三千四百有奇風作時鈴齊鳴若編鐘編磬之相和  
焉最上一層其南有碑不知何年所立修塔時寺僧有  
揭本索之不可得也又上露盤相輪鑿金火珠以鎮其  
頂塔下壇八面各安一鐵鼎高丈餘腹按八方畫八卦  
明萬曆年所鑄塔前一石幢上刻尊勝陀羅尼遼重熙  
十七年立帝京景物畧謂是隋開皇年物誤矣幢前有  
碑覆以亭蓋寺舊名天王宣德十年始改今名碑卽勒  
改題寺名勅也塔後第二殿扁曰大覺再後爲廣善戒  
壇亭午日射右扉倒影落石上作雙椽燭形蓋扉下偶

有二隙光緣此而分也

冷然志

弘化寺在天寧寺東南惟餘一殿存并寺額佛像俱亡之矣殿後百餘步有塔不甚高然亦重檐七層其第一層有石陷壁間刻曰僧錄司左善世大慈仁寺開山第一代住持傳曹洞宗師大機老人塔寺西北隅柁木中冢纍纍遺碑尙存大璫徐澄王朝等所瘞也

行國錄

廣寧門外御菜園觀音寺一稱海會禪林亦白紙坊地也成化中上林苑監覃盈建以北有玉河鄉觀音寺上八日爲南觀音寺殿右一碑直文淵閣中書舍人永嘉姜立綱所書也碑建于成化五年正月

陝志

口雲觀在天寧寺西北前爲玉曆長春之殿庭樹四碑

一爲禮部尚書胡濙所撰一爲翰林修撰許彬撰一爲

天順中東吳邵以正立一爲小直沽天如宮住持李得晟立殿右有儒仙之殿中有塑像赭面黑髯襍頭團花袍上帶袞補按李道謙甘水仙源錄有觀津張本者正大九年以翰林學士使北見雷遂隱爲黃冠居燕長春宮疑卽其人也再入爲七真翁光之殿左碑一明兵科給事中石首趙士賢撰文右碑一戶部員外郎維揚張瓚撰文堂中列七真像旁繪十八弟子拂拭塵土隱約可辨者北壁則抱元宗師趙道堅太元宗師宋道生清和宗師尹志平太素宗師孫志堅守一宗師志誠明真宗師何志清東壁則冲和宗師張志素崇寧宗師李志常洞明宗師綦志清口口宗師潘得冲西壁則敷心宗師孟志穩光教宗師鄭志修抱朴宗師鞠志圓光範



宗師于志可□□宗師王志明按得晟碑記尚有宋得  
方張志遠楊志靜三人已漫滅不可復識矣又北爲真  
寂堂卽處順堂故址左碑爲陝西按察副使都人劉效  
祖撰文右碑爲刑部尚書湖南顏頤壽撰文堂中塑丘  
真人像二其大者雙瞳點漆精采如生并阿尼哥劉鑾  
輩不能爲也冲和宗師本潘得冲號而西壁作張志素  
又孟志源乃作志穩皆與仙源錄異惟十八人姓名則  
仙源錄碑所未備也人海記  
白雲觀西土阜高丈餘週圍百步疑卽潘尊師琴臺故  
址觀於每年正月十九日觀者填塞號燕九節而劉仲  
修碑記云是日爲長春真人誕辰都人士携榼於此謂  
之讌丘其義不同當並存以資旅話者也倚晴閣雜

極樂寺東有兩花亭石閣擁之眺遠大饒爽致折而西  
爲通靈觀庭中老柏四株兩人抱之不能合也青來閣  
集

王暉清明日游長春宮作鳴珂振轂滿重城花底春  
光沸玉笙放眼壺天如隔世侍談僊馭勝登瀛松風  
韻颯金鏘靜竹露光寒鶴夢清且莫臨漪門外去夕  
陽正在總真明自注總真閣名 秋澗集

見田謹按元之長春宮本在太液池上非今  
之白雲觀今附于此

王暉真常觀記大都南城故宜中里真常觀爲全真  
學者重元子樊君志應所建也崇堂爲殿下至齋厨  
庫廡靡不修治復置蔬圃一區負郭田二百畝資給

道衆乃洒掃蠲潔廣植花木往來皆一時名公元貞  
 元祀正月五日晨興召門弟子齊道亭劉道安付以  
 後事怡然而逝寧神于五華山道錄劉文甫請述觀  
 記仍爲門人作望思歸來之篇辭曰瓊芝爲冠兮青  
 霞裳遠引高蹈兮與道翱翔至人出世兮化無方驟  
 駕鶴馭兮雲海茫沍假息有室兮燕處有堂師今不  
 見兮莫知我傷庶幾歸來兮華表之傍 秋淵集

弘治九年官買阜成門外果園一區計地一頃三十畝  
 內建道觀賜額曰元應 蘇丘雜抄

西郭外萬壽寺今上所建大內出一鐘成祖時少帥姚  
 廣孝監鑄重八萬七千斤徑丈有四尺長丈五尺銅質  
 甚古內外刻華嚴經一部華亭沈度所書鑄時年月日

時皆丁未今徙置之日爲六月十六日亦四丁未相符  
 事亦奇矣 燕邸紀聞

北京天寧寺有一磬傳是漢明帝時物每誦一經書其  
 經名帖于上則磬自鳴經完乃止 耳新

日下舊聞卷二十二

郊坳四

慈壽寺去阜成門八里聖母慈聖皇太后所建蓋正德  
間大瑞谷大用故地經始丁萬曆四年凡二歲告成入  
山門卽有窳堵波高入雲表名永安塔華煥精嚴蓋慈  
聖旣捐帑各邸復助之因得速就如此野獲編  
慈壽寺在阜成門外八里宣文皇太后所建成于萬曆  
六年秋殿宇壯麗一塔聳出雲漢四壁金剛像如生湧  
幢小品

八里莊慈壽寺神宗爲慈聖皇太后建也寶藏閣係聖  
母御筆題稍西一道觀世宗時極盛今頽楹殘礎滅沒  
于荒榛翳莽中矣燕都游覽志

萬曆丙子慈聖皇太后為穆考薦冥祉神宗祈嗣卜地  
阜成門外八里建寺焉寺成賜名慈壽勅大學士張居  
正撰碑時瑞蓮產于慈寧新宮命閣臣申時行許國王  
錫爵賦之碑勒寺左寺有永安壽塔塔十三級聳雲中  
中為延壽殿後為寧安閣閣扁慈聖手書後殿奉九蓮  
菩薩太后夢中菩薩數現授太后經乃審厥象范金祀  
之帝京景物畧

九蓮菩薩者孝定皇后夢中授經者也覺而一字不遺  
因錄入大藏中旋作慈壽寺其後建九蓮閣內塑菩薩  
像跨一鳳而九首寺僧相傳菩薩為孝定前身也玉堂  
書影

張居正勅建慈壽寺碑寺在都門阜成關外八里

聖母慈聖宣文皇太后親出供奉金委太監楊輝董  
其役以萬曆丙子春始事外為山門天王殿左右列  
鐘鼓樓內為永安壽塔中為延壽殿後為寧安閣旁  
為伽藍祖師大土地藏四殿繚以畫廊百楹禪堂方  
丈三所又賜園一區莊田三十頃食其粟以老僧覺  
淳主之中官王臣典領焉寺成名之曰慈壽太岳集  
于慎行勅建慈壽寺碑畧聖母慈聖皇太后與我皇  
上永懷穆考在天之靈思創福地以薦冥祉乃命內  
臣卜地阜成門外八里得太監谷大用故地一區  
遂出宮中供奉金潞王公主宮眷內侍各捐湯沐經  
始于萬曆四年二月至六年仲秋既望落成賜名曰  
慈壽蓋以為聖母祝也穀城山房集

陳萬言慈壽寺詩帝城門外剝台衛國中臺初地三  
摩入慈宮萬壽開午鐘招雉雀夜雨積莓苔怪底花  
間客浮名逐夢來

鉞園集

公龕慈壽寺詩郭外浮圖挿太虛空王臺殿逼宸  
蓮花座與青山對貝葉經傳白馬餘燕地風沙飄客  
淚漢朝陵墓想繁興鄉關有夢腸堪斷東望誰傳尺

素書

卜東園詩集

慈壽寺傍有菴曰摩訶菴不甚大潔淨特勝他菴殿前  
後多松檜四隅各有高樓疊石爲之登樓一望川原如  
織西山蒼翠欲與人衣袂接右卽法藏菴爲摩訶別院  
僧無鉉所舁無鉉善琴

長安客話

摩訶菴嘉靖丙午建也菴有樓以雪

山夫啟中魏璫

通菴下偶指樓曰宜去之卽母毀其西有大乘菴

景物畧

黃鳳翔宿摩訶菴詩颺風卷落照倦鳥棲故林獨坐  
招提中悠悠愜我心徘徊不能歸借榻紆長吟小牖  
月華入踈闌雲氣深中庭有孤松清宵騰梵音人世  
日代謝幽懷無古今續紛逐塵者羈縻空陸沉僕夫  
休戒曉吾意欲投簪

黃宗伯集

馮琦宿法藏菴詩妙諦聞籠藏清談過虎谿更從雙  
樹杪借我一枝棲法界心常淨名琴手自攜曲終人  
境寂殘月竹房西

北海集

呂運宮太監張永建

行國錄

宛平縣西黃村有勅賜保明寺寺中尼呂氏陝人正統

間駕出關尼送駕苦諫不聽及上還轅復辟念之乃建寺賜額人稱爲皇姑寺

耳譚

順天保明寺是比丘尼焚修處寺建自呂姑正統間諫阻北征不聽後復辟念之封爲御妹建寺賜額藏大順手勅三道有寺人司戶人不易入

燕都游覽志

皇姑寺在京師西山不知所始嘉靖六年丁亥上諭輔臣楊一清云前有旨下部謂尼僧與僧道不同而尼僧寺與僧寺道觀又不同今因桂萼奏毀尼寺已行下矣今若皇姑寺仍留是不去其根也乃旨出之後三四日不知何日哀奏兩宮皇伯母見諭以皇姑爲孝宗所建似不可毀聖母亦以孝宗爲言蓋小人進禍福之言故兩宮一時傳諭次日聖母又諭欲建一寺卽將此寺與

我亦好蓋此寺乃皇親內宦供給信施必有請告之者矣按世宗此旨已洞見宮掖隱情旣而聖諭又下輔臣楊一清等曰慈訓兩頒宜卽順命但懲惡須去本方免後患今將此寺房留與無歸尼僧暫住止着終身不許復引其類其祖宗時所賜勅額追回此旨旣下其後因循至今又八十年矣尼僧之增日多宣淫日盛檀施亦日益不貲矣蓋其根株旣在內廷以世宗英斷尚不能鏟除况後世乎自丁亥後又十年而霍文敏韜爲南禮卿首逐尼僧盡毀其菴金陵一片地頓爾清淨霍去而尼復集菴復興更倍往日矣是時上又審諭閣臣云朕又將有議此寺額名之意并告卿知夫順天保明者明是我朝國號此言尼僧之祖能順聖祖奉天開極此惟

皇天命之何待後日以一妖尼能保大明也哉又云皇姑者尤不好聽言我皇家之姑也當時此寺云勅賜不云勅建便可見非祖宗本意也故朕深嫉之因與卿密知之觀世宗屢諭不特明晰事理且曲揣人情真是禹鼎秦鏡且開諭輔弼曲從兩宮之意然于實錄中僅載一二語不能如此詳明不知述史者何所據也予今所紀亦僅十之四五耳

野獲編

按山東濟南長清縣之長城堡亦有皇姑菴覽其遺碑具載呂姑諫阻裕陵北征本末碑稱姑山東人與諸書所紀不同未詳孰是

太傅惠安伯張公園在嘉興觀之右牡丹芍藥各數百畝花時主人制小竹堯供游客行花塋中

燕都游覽志

惠安伯張元善園中牡丹自言經營四十餘年筋力半疲于此花自籬落至門屏無非牡丹也最後一空亭周遭皆芍藥密如韭畦約有十萬餘本

袁中郎集

都城牡丹時無不往觀惠安園者園在嘉興觀西二里堂後牡丹數百畝

帝京景物畧

王世貞過張氏園詩休沐時相過猶言惜未頻風塵餘此地山水更何人高詠消蘭燼清輝掩桂輪冰盤薦沉綠不道故侯貧

弇州山人稿

門頭村去郊西八里許以其地為西山門徑故名

燕都游覽志

袁宏道詩踏青猶記出青門先問門頭第幾村舊日把杯人已往雛鶯新柳暗傷魂

中郎集

帝京西十五里海墜凡二南則觶于白龍廟又南湊于  
湖北斜隣嶺峒河又西五里爲壘山又五里爲青龍桁  
河東南流入于淀之夕陽延而南者五里旁與巴溝隣  
曰丹稜泚泚之大以百頃十畝瀦爲湖西有貴人別業  
在焉後有樓泚自垣以西入于樓之澹爲小湖中多菱  
芡魚蝦上有竹萬個又有石苔沙棠甘菊忍冬靡蕪之  
屬蔓延以入于泚樓外有大查鐵鎖纜之以度行者南  
爲官道東入海墜循泚而西則歷相連有石梁曰西勾  
復瀦爲小溪溪上有大磐石溪中倒映見西山諸峯小  
魚淊淊如吹雲又南爲陂五六泚水再瀦爲溪有村曰  
東雉水入地中出于巴溝自溝達于白石以入于高粱  
湖而北白嶼峒入于西湖東有古祠斷碑尚存乃元上

都路制使朶里真揆文上有丹稜泚字餘皆磨滅泚雖  
小然忽瀦忽隱可舟可釣蓋神臯之勝也 薊丘集

高粱橋西北十里平地有泉四出瀦爲小溪凡數十處  
北爲北海淀南爲南海淀北海之水來自巴溝或云巴  
溝卽南海淀也有石梁一是曰西勾巴溝之旁有水從  
青龍橋河東南流入于淀南五里爲丹稜泚又南爲陂  
五六出于巴溝達白石橋與高粱水合 長安客話

巴溝自青龍橋東南入于淀淀南五里丹稜泚泚南陂  
五六達白石橋與高粱水并泚之西可汎舟李武清以  
爲園方十里正中挹海堂堂北亭置清雅二字明肅太  
后手書也園北有橋曰婁兜一曰西勾 帝京景物畧  
武清侯別業額曰清華園廣十里園中牡丹多異種以



綠蝴蝶爲最開時足稱花海中起高樓五楹樓  
上復起一臺俯瞰玉泉諸山御書青天白日四字于中  
東西書光華乾坤相對字各長二尺餘

燕都游覽志

朱德潤同王編修游西山海子詩晴川低迴山蒼蒼  
涵烟夾谿十里長山腰澗曲細泉響下激石竇爲微  
潢枯梢挽風秋色裏修林落葉堆長岡林疎石露見  
茅屋時有小徑通微茫招提橫截翠微上闌干九曲  
雲飛揚自從束書離故鄉脚頭青鞵走山梁山川悠  
長日月速躋攀方寸何能強太原高人知我意請列  
紈素書滄浪丹青不關名利眼虎頭癡絕非王郎百  
年有懷良可晒還拂長松思道場

存復齋稿

王嘉謨海塾樓堯橋作淵淵溪水中青蒲葉靡靡

然林木間幽懷信予美細藻啜潛鱗山梁雉文雉尋

幽復遠涉濟勝良堪喜夕陽忽西流平湖澹煙起慷

慨賦新詩行歌出山市

薊丘集

又海塾西勾橋上作微風何澹澹宿雨隨人飛遙望

石梁前楊柳蔭重圍淵壑寂無聲獨行向霏微寒芳

自可藉寄賞幸不違徒倚豐林間坦步徐言歸

同上

朱國祚西勾橋口占東雉村邊水西勾橋下流濯纓

人不至處處浴沙鷗

介石齋集

袁中道海淀集李戚畹園詩滿目塵沙塞路蹊夢魂

久已憶山棲誰知烟水青溪曲只在天都紫陌西鎮

日浮舟穿柳澗有時調馬出花畦到來賓主紛相失

總是仙源路易迷

珂雪齋集

費尚伊海澱莊詩一鑑藏山溜雙虹跨石梁浦蓮侵  
檻出溪樹引杯長暑薄青絲絳涼生白苧裳帝城風

日好拚

到斜陽

市隱園集

區懷瑞友人招飲海澱不果往却寄詩羽扇驅蠅不  
暫閒隼烟赤日掩重關輪君匹馬城西去十里荷花  
海澱還

游業

李開先游海澱詩序嘉靖乙未三月王遵岩謫判毘  
陵武選吳皖山檄呂江峯高熊南沙過翰林唐荆川  
順之陳後岡東禮部張少宰元孝李克齋遂及予其  
八人餞之海甸望日出阜成門至則荒涼殊甚蓋張  
昌國以癸巳罹禍已三年矣亭臺傾圮惟水聲潺潺  
不異舊時酒酣賦詩皖山先成詩曰五侯臺榭競芳

菲三日花深車馬稀絃管不從流水奏綺羅應化暮  
雲飛空聞玉饌分天府曾覩金葩捧御幃借問樓前  
桃李月從來此地幾人非次日夏桂洲遂劾張李二  
司屬無事慢游下獄未久七人相次罷謫皖山幸而  
獨免詩卷歸于予事如隔世而人多下世愴然作序  
不惟感諸友之易消歇而且歎大臣之善傾陷也

龍岡居稿

北澱有園一區水曹郎米萬鍾仲詔新築也曰勺園又  
曰風煙里中有曰色空天曰太一葉曰松垞曰翠葆榭  
曰林於澁都人稱曰米家園仲詔念園在郊關不能日  
涉因繪園中景爲燈丘壑亭臺纖悉具備都人又稱米  
家燈仲詔於元夕集客賦詩呂邦耀卽席口占二首其

一曰玉綃疊出上元村雙炬懸來景物繁恍惚重游丘  
壑裏米家燈是米家園其二曰輕舟寒夜渡無水波入  
銀綃訝月升宛似夢中曾一照米家園是米家燈 長安  
客話

勺園徑曰風煙里入徑亂石磊砢高柳蔭之南有陂陂  
上橋曰纓雲集蘇子瞻書下橋爲屏墻墻上石曰雀浜  
勒黃山谷書折而北爲文水陂跨水有齋曰定舫舫西  
高阜題曰松風水月阜斷爲橋曰透迤梁主人所自書  
也踰梁而北爲勺海堂吳文仲篆堂前怪石蹲焉枯子  
松倚之其右爲曲廊有屋如舫曰太乙葉迺遭皆白蓮  
花也東南皆竹有碑曰林於溼有高樓湧竹林中曰翠  
葆樓鄒迺光書下樓北行爲槎枒渡亦主人自書又北

爲水榭最後一堂北牕一拓則稻畦千頃不復有繚垣  
焉 燕都游覽志

王思任題勺園詩纔辭帝里入風煙處處亭臺鏡裏  
天夢到江南深樹底吳兒歌板放秋船 王季重集

西湖東西二里南北三里蓋燕之舊池也淥水澄澹川  
亭望遠爲游矚之勝所 水經注

西湖在玉泉山下環湖十里爲一郡之勝觀 紀纂淵海  
西湖去玉泉山僅里許卽玉泉龍泉所瀦此地最窪受  
諸泉之委滙爲巨浸土名大泊湖沙禽水鳥出沒隱見  
于天光雲影中可稱絕勝湖濱舊有釣臺武廟幸西山  
曾釣於此萬曆十六年今上謁陵廻鑾幸西山經西湖  
登龍舟后妃嬪御皆從先期水衡於下流閉水水與岍

平白波森湧一望十里內侍潛繫巨魚水中以標識之  
一舉網紫鱗潑刺波面天顏亦爲解頤是時餘艘青雀  
首尾相銜卽漢之昆明殆不過是近爲南人興水田之  
利盡決諸窪築堤列塍爲菑爲畚蓐芡蓮菰靡不畢具  
宛然江南風景而長波瀾望則少減矣 長安客話  
西湖之澣佛寺有十土人名西湖十寺 余文敏公集  
西湖蓮花千畝以守衛者嚴故花事特盛步長堤息龍  
王廟香風繞袖至功德寺水漸約花亦減矣 瀟碧堂集  
過響水聞至龍潭樹益多水益濶是爲西湖盛夏之月  
芙蓉十里堤柳叢翠中隱見村落行至功德寺有危橋  
可坐寺僧多業農日旣西馳執畚鍤帶笠而歸水田活  
活羣蛙亂鳴真田家之樂也 珂雪齋集

西湖方十餘里有山趾其涯曰甕山寺曰圓靜寺左田  
右湖又三里爲功德寺洪波衍其東幽林出其南路盡  
叢薄始達于野乃有玉泉出于山下歎薄轉激散爲谿  
池池上有亭宣宗駐蹕處也又一里爲華嚴寺有洞三  
其南爲呂公洞一竅深黑投以石有水聲莫有窮之者

懷麓堂集

由香山至望湖亭一水夾溝而出苻草交漬凡三里許  
水漸狹隱隱不知所之游者遂以西湖止此望通衢取  
道入城不知轉入林中灌木忽開廻堤十里鷓鴣鵲  
毳飛遠立遠水長流不減杭之段家橋也 燕都游覽志  
水從高粱橋而西傍有極樂真覺諸寺臨之前廣源聞  
卽之上麥莊橋越之過橋爲湖界以長堤湖在隄南稻

田豆場在隄北曰西堤者城西隄也隄行八九里龍王廟廟之旁黑龍潭又行一里堤盡右有村上青龍橋卽玉泉山下也帝京景物畧

永樂二年八月北京行部言宛平昌平二縣西湖景東牛闌莊及青龍華家甕山三閘水衝決隄岸百六十丈命發軍民修治五年五月北京行部言自昌平縣東南白浮村至西湖水流水河口一百里宜增置十二閘請以民丁二十萬官給費用修置命以運糧軍士浚之九月修西湖景堤三百七十九丈二十二年十二月罷海子至西湖巡視官謂尚書蹇義曰古者山澤之利與民共之朕之心凡可利民雖府庫不吝况山澤所產哉辰祖實錄

王直西湖詩玉泉東漚浸平沙八月芙蓉尚自花

島下通蛟女室晴波泳映梵王家常時鳧聞清貝

舊日魚龍識翠華堤下連雲航稻熟江南風物未宜

誇王文端公集

馬汝驥行經西湖詩宣皇畫舸舫湖中鼉鼓鸞簫震

碧空何似漢家汾水上擢歌搖落嘆秋風珠林翠閣

倚長湖倒映西山入畫圖若得輕舟泛明月風流還

似剡溪無西元

文徵明西湖詩春湖落日水拖藍天影樓臺上下涵

十里青山行畫裏雙飛白鳥似江南思家忽動扁舟

興顧影深懷短綬慚不盡平生淹戀意綠陰深處更

停驂市田集

朱正初湖上作長堤曲曲石磷磷柳色參差接望春  
烟鎖禁中疑作雨風過湖上不生塵翠分懸瀑穿雲  
白綠盡平蕪入漲新隨處青旗能醉客客身千載此  
二淪 長安客話

鄒神遊燕京西湖詩垂鞭遵廣陌攜酒眺長汀葭菼  
參差綠巖巒遠近青鳥飛天欲暝龍卧水猶腥賴有

張平子裁詩表地靈 鄒中憲集

何御西湖作西湖隄上立風景心遊心十里澄虛色  
羣峯落翠陰孤蒲隨遠近魚鳥自高深一望天河接

星槎擬共尋 白湖集

朱國祚西山湖上詩芍藥闌邊花氣收鷓鴣谷口斷

雲浮倦遊愛說江鄉事先試西湖一葉舟 介石齋集

元大曆二年五月以儲慶司斤貲金二十錠銀百錠建

大承天護聖寺九月市故宋太后金氏田為大承天護

聖寺永業十月立大承天護聖寺營繕提點所 元史文

宗紀

上答失里皇后以銀五萬兩助建大承天護聖寺 元史

后妃傳

至順元年四月以所籍張珪諸子田四百頃賜大承天  
護聖寺為永業二年二月命田賦總管府稅鑛銀輸大  
承天護聖寺三月以籍入速速班丹徹理帖木兒資產  
賜大承天護聖寺為永業四月發衛卒三千助大承天  
護聖寺工役九月命留守司發軍士築馬蹕臺于大承  
天護聖寺東是月幸大承天護聖寺 元史文宗紀

元統元年十月奉文宗皇帝及太皇太后御容于大承  
天護聖寺至正十三年三月詔修大承天護聖寺賜鈔  
二萬錠元史順帝紀

虞集大承天護聖寺碑天曆二年歲在己巳春月  
帝若曰予承宗廟之重右臨天下夙夜兢懼思所以  
上繼祖宗下安民庶者不敢少置也矧予昔在幼冲  
太皇太后躬保持而導迪之欲報之德亦不敢少忘  
也稽諸佛氏之書孝莫重于報親慈莫廣於及物而  
吾佛之所以陰相我國家者豈可量哉汝太禧宗禋  
使月魯不花中書平章明理董阿大都留守張金界  
奴其爲朕度地以作梵剎稱朕心焉四月辛酉郊  
觀于玉泉之陽謂侍臣曰會聞複嶽隱隆西北太湖

之浸汪洋滄溷時而東高甕山在焉旁薄扶輿固祇  
園之地也使太史脉之曰吉秋八月晦立隆祥總管  
府以領之鑄銀爲印秩正三品以臣月魯不花領府  
事將作臣阿麻球爲達魯花赤國語達魯花赤官屬  
之長也臣金界奴爲總管上曰建寺而不先正其名  
民將因其地而稱之其署題曰大承天護聖寺又曰  
寺所以嚴奉祀事而歷氓雜居則幾乎瀆矣買旁近  
地得十頃有奇皆厚直以予之分賜從臣俾爲休沐  
之邸侍祠而至則處焉且命其總管府臣相十用以  
買之度其歲入以爲僧食明年上受尊號改元至順  
十月上命太師臣燕帖木兒率百官詣寺所告諸后  
上之神始命大匠治木因命中書左丞臣撒迪爲隆

詳總督府達魯花赤蓋以省臣重其事也二年四月十六日始作土功治佛殿基得古金銅之器于地中多事佛之儀物實有密契者云寺之前殿寘釋迦然燈彌勒文殊金剛并二大士之像後殿寘五智如來之像西殿度金書大藏經皇后之所施也東殿度墨書大藏經歲庚午之所施也又像護法神王于西室護世天王于東室二閣在水中央東曰圓通有觀音大士像西曰壽仁上所御也曰神御殿奉太皇太后辟容於中且有獻月有薦時有享器用金寶曰壽禧殿上齋宮也考宿衛之舍畢具九月上諭臣金界奴曰朕之建寺非徼福以私朕躬也昔者國家有佛寺之建金帛穀粟一出于國之經費受役凡徒則民與

兵官府供億並緣爲姦非朕意也今茲役也工傭其直物償其價勿使有司因得以重困吾民臣金界奴頓首受詔而退鳩工以集事材木瓦丹漆設色必精必良其土宜交易得所稱事出備藝各奏能施無遺巧人樂效力若子趨父屬樞密儲政兩院臣請以所領軍就役而給錢如民則軍士亦被惠矣從之凡役軍四千三百人留守臣言寺有行宮天子之所齋也嚴重不敢褻請以所領匠將作而給錢如兩院之兵亦從之十月十五日上覽而悅之陸隆祥總管府爲隆祥使司秩從二品命太禧宗禋使臣晃火兒不花臣撒迪臣阿麻疎大司農臣金界奴爲之使他官與次俱升又作東別殿構才別殿丈室講堂衆沙門



之民會就之所碑亭并亭庖漏庫既門三齋梁成稱  
觀美凡規制皆圖以獻而上親臨定焉皇后出大慶  
禮賜白金從戶部易鈔四萬錠及割田賦之在荆襄  
者以資之三年寺大成于是召五臺山萬聖寺釋師  
惠印特賜榮祿大夫司徒主教于寺有勅命至祖常  
臣集臣法洪臣惠印製文以刻諸碑道藏季古錄  
宋契至順二年五月從駕觀承天護聖寺詩陪駕西  
郊外遐觀倦未還荷深七里泊雲起五華山境勝嗟  
來喜官微媿不閒憑聽歌夏諺直擬車躋攀惠石集  
傅若金遊城西承天護聖寺作梵宮何處巍白日輝  
流藻前楹交網樹陰剛被靈草宿昔樞華麗河沙施  
七寶丹霞通飛閣清飈激馳道車馬縱橫至虛谷漫

浩浩飛龍逝不返令人傷懷抱又游子愛良辰出門  
各有攜陽春發惠氣好鳥鳴啾啾芳花明曲渚新楊  
拂大堤羣物紛相說斯人多所懷飄彼陌上塵比爲  
水底泥百年亮如此不樂復奚爲傳與礪詩集  
許有壬護聖寺汎舟浣溪沙詞花露濃披桂棹香柳  
風輕拂葛衣泉放歌深入水雲鄉荷葉杯中傾綠醕  
瓜皮船上載紅粧都堂何似住谿堂圭塘小藁  
至正初承天護聖寺火有旨更作李穰上言水旱相仍  
公私俱乏不宜妄興大役議遂寢元史本傳  
功德寺舊名護聖前有古臺三相傳元主游樂更衣處  
或曰此看花釣魚臺也寺極壯麗中立二穹碑其一宣  
宗章皇帝御製建寺文其一元舊物番字莫能讀也毘

盧閣崇可數尋凭闕而眺一寺之勝皆在目前蓋寺倚山而剏寺西景皇帝陵及尉悼王墓在焉

南濠集

功德寺甚弘敞後殿尤精麗殿柱及藏經笥皆錐金錐金者布純金為地髹綵其上以錐畫之為人物花鳥狀若繪畫然又有刻絲觀音一軸懸于梁際此宋元物寺僧云禁中所賜也

懷麓堂集

功德寺宣皇臨幸之地西山東麓盡處也

拘虛集

西湖將盡為功德寺外有三廢臺問之為元時遺址兩廊畫壁俱闕麗

文義

功德寺修于宣德二年正殿及方丈凡七進基皆九檨擬掖庭制度費數十萬緡宣德十年宣廟西郊省歛駐蹕于寺因留輦仗寺中自後遂為列聖駐蹕之所嘉靖

中世廟謁景皇帝陵有司以金山口路隘鑿濶數十尺識者謂此功德寺白虎口也虎口張將不利于寺既而上駐輦寺中膳罷周行廊廡見金剛像猥惡心忽悸而怒因以宮殿僭踰坐僧罪撤去之寺遂廢

長安客話

功德寺廢今存者門耳門外二三古木各三四十圍根半出土外傍多水田僧無寺業農事破屋數間供一木球施以丹堊寺初興時板菴禪師能役是球球大如斗不脛而走逢人躍擊地如首稽叩入侯門戚里募金人目為木毬使者所募金錢以建巨刹成化中僧戒靜建一閣重簷曲房為累朝駐蹕地

帝京景物畧

功德寺有木毬使者其事近于怪按宋張世南游宦紀聞雪峯寺僧義存於唐懿宗咸通十一年開山創寺

乾符二年賜號真覺禪師寺有木毬相傳受真覺役使  
呼僕延客毬皆自往來嘉泰間寺災毬忽滾入池中得  
不壞然則以木毬爲使浮屠固有其術益有先板菴而  
役之者矣 涿木亭雜識

程敏政自玉泉至功德寺詩東風幾日到郊坰

汀蒲已自青羈客乍來無暇日野人相見亦忘形

湖當鷺嶺烟光重路入龍潭水氣腥聞說先皇曾駐蹕

紅雲猶繞玉泉亭 篋數文集

王守仁夜宿功德寺詩水邊楊柳覆茅楹飲馬春流

上一亭坐久遂忘歸路夕溪雲正壓暮山青 王文成

公集

李夢陽功德寺集唐詩憶昔霓旌下南苑江亭晚

靜年芳重門深鎖無人到僧在翠微開竹房 空同集

何景明功德寺詩寶地烟霞上珠林霄漢間宣皇留

殿宇今日共追攀御榻臨丹壑行宮鎖碧山帝城看

不遠時見五雲還 大復山人集

薛蕙功德寺詩憶昨宣皇帝端居大有年莊嚴修佛

土功德施人天龍象山開闢金銀地接連傷心萬歲

後陵谷尚依然 西原集

李濂功德寺詩宣廟行宮裊碧蘿霓旌幾駐玉泉阿

三楊扈從宸恩重十載昇平樂事多勅寺松雲封殿

閣釣臺霜水落龍鼉白頭野老空山夕間說曾看鳳

輦過 嵩渚集

莫如忠功德廢寺詩功德何年寺開山紀釋曇諸天

迷宿莽雙樹網晴嵐  
逕掩花空落壇墟鳥不參  
寥寥禪誦侶穴土自爲龕

崇蘭館集

歐大任功德寺詩  
宣皇游豫日此地六龍回  
忍草生馳道慈雲護講臺  
蘆汀仙鷺浴黍雪御桃開  
寂寂留春卉僧猶望幸來

歐虞部集

黃鳳翔功德寺詩  
繚繞招提路平湖映翠嵐  
烟波生道左秋色似江南  
鐘磬天香近兼葭雨氣含  
心隨漁艇去望望欲停驂

黃宗伯集

功德寺側皆古松有菴曰松林  
游人多於此憇焉出松林菴  
稍西轉至金山口望見景皇帝陵  
及諸王公主墓

燕都游覽志

甕山在都城西三十里清

玉泉之東西湖當其前金

山拱其後山下有寺曰圓靜寺  
後石壁百尺步磴而上

晶菴在焉

青谿漫稿

西湖堤東稻畦千頃接甕山之麓  
有寺曰圓靜因巖而構甃爲石磴  
游者拾級而上山頂有屋曰雪洞  
俯視湖曲平田遠村綿亘無際

白巖集

甕山圓靜寺左俯綠疇右臨碧浸  
近山之勝於是乎始

長安可游記

甕山相傳有老父鑿得石甕  
上有華蟲雕刻文中有物數十種  
悉爲老父攜去置甕于山之西  
留識曰石甕從貧帝里人不之信也  
嘉靖初甕不知所存嗣是物力漸

耗

薊丘集

甕山在海淀西五里土色純盧其南巖若洞而圯者一

樵人曰此少鬲仙室也人家傍山小具池亭桔槔鋤犁  
咸置垣下酷似江南風景距南麓數百武爲耶律楚材  
墓西湖正當其前袁廷玉詩玉泉東畔甕山陽水抱孤  
村地脈長蓋咏此也今墓前石像猶存長安客話  
甕山去阜成門二十餘里土赤墳童童無草木度山前  
小橋而南人家傍山臨湖水田碁布山後一畝泉今失  
去山上一寺破瓦壞垣額曰圓靜弘治七年助聖夫人  
羅氏所建也山下數十武元耶律楚材墓墓前祠廢石  
像尚存表碣羊虎零落一翁仲立未仆天啟七年夏夜  
有螢千百集翁仲首土人望見夜譁曰石人眼光也質  
明其踣而碎之帝京景物畧  
耶律丞相墓在瓮山下前有石像鬚分三縷其長過膝

匏翁家藏集

耶律楚材大有造于中國功德塞天地元世祖眷之亦  
異他將相其壽域想必屬當時恩賜者近日友人治  
別業於京城外西山忽發十塚開櫬得大頭顱加常人  
幾倍不知爲何人葬地予聞之諫止之曰此無論何代  
殆必異人盍早納其匱閉之未幾掘得碣石則楚材墓  
也雖稍爲葺治聞壙中他物散去多矣耶律生前舉動  
已足慈氏後身又安問遺骸之完缺但功濟一世而七  
尺之不保報應之說似不足信友人本吳籍髫年登北  
畿賢書慧而有心計頗成富家後甫強仕卽世竟無後  
野獲編

楊文秀金季以善墨聞其法不用松炬而用燈煤子彬

得其遺法以授耶律楚材楚材授子鑄使造一萬九銘  
曰玉泉萬笏墨史

王嘉謨甕山詩瀾瀾湖水外疊嶺削青冥十丈涵霜  
鏡三春洗翠屏山寒果半落石古草長青日夕迷歸  
路樵聲自可聽薊丘集

謝榛夜自西湖循甕山同玉峯上人步歸蘭若詩湖  
色冷春衣沙禽夜尚飛路隨山下轉僧伴月中歸祇  
樹藏金界禪燈出翠微他年謝靈運結社願無違四  
滇山人集

吳希賢過甕山倪舜咨攜酒至漫賦曉出西郭門穿  
雲過林麓小徑入湖陰石磴莓苔綠主人攜酒至  
行賦詩續歸驂不可留夕陽在松木兩朝遺詩

王慎中圓靜寺後山詩策馬晴隨滄水吏捫蘿幽到  
碧山岑最憐絕壁流霞氣况有澄湖清客心落木蕭  
疎明遠近行雲縹緲靜高深靈芝紫蕨亦吾分石髓  
丹砂共爾尋遵岩集

王穉登圓靜寺詩香閣林端出登臨夕靄間霜寒半  
陂水木落一禪關施食湖中鳥窺牕塞上山能容下  
塵榻信宿竟忘還燕市集

劉效祖甕山耶律丞相祠作迢遞荒山下披榛拜古  
祠衣冠猶左袵歲月已明時溪遠泉聲細林深日影  
遲黃沙空朔漠誰與問荒碑劉念菴詩集

王嘉謨耶律丞相墓作丞相遺丘湖水陰荒榛野草  
自蕭森亭前瀑布搖空穴雪後寒禽啁大林慘愴尚

思戎馬日艱難深仗哲人心雲龍鵝鶴真餘事獨弔  
空山淚滿襟薊丘集

按耶律文正王題和林新居壁詩有舊隱西山五畝宮之句其子所製墨亦以玉泉爲名今甕山遺墓或卽其所居井椽未可定也

甕山北五里爲青龍橋元時白浮堰之上游也其西通

金山口其北斜界百望山長安客話

七里泊在碾莊源自昌平州東南流至宛平縣合高粱

河青龍橋跨其上明一統志

青龍閣在都城西北三十里水部備考

何御青龍橋南遇汪旦詩沿湖行欲竟前望青龍橋  
茅茨鬱烟火稍已隣紛囂故人歎相值眷言相招邀

山居當甕麓轉岐路非遙松膏晷繼夜菰米足供朝

畦蔬摘露非林果來新樵慷慨珍來意宛戀停子鑣

野風吹秋水征馬鳴蕭蕭願留竟莫克投贈媿瓊瑤

白湖集

青龍橋側數武有寺依山傍巖山腰有閣前臨一鏡堤

柳溪流雜以畦吟叢翠之中隱見村落珂雪齋集

玉泉山以泉名泉出石罅溜而爲池廣三丈許水清而

碧細石流沙綠藻紫荇一一可辨池東跨小石橋水經

橋下東流入西湖山頂有金行宮芙蓉殿故址相傳章

宗嘗避暑於此長安客話

穿青龍橋而西得玉泉山山培塿耳而土紋隱起作蒼  
龍鱗其下爲池瀦泉而亭之曰望湖亭其東爲華嚴寺

寺西泉清可辨蘿髮 緱山集

玉泉山沙痕石隙隨地皆泉山陽有巨穴泉歎而上淙

淙有聲或名之噴雪泉 燕都游覽志

玉泉山泉出如沸瀉為池清可鑑毛髮此西月之一也

白岩集

玉泉山金章宗嘗建行宮今廢山之北麓鑿石為螭頭

泉從螭口出瀦而為池 南濠集

玉泉山麓有寺所謂玉泉寺也山有呂公洞稍東為龍

王祠淳泓方廣數丈湧泉如珠名裂帛湖然玉泉山傍

每遇石縫即迸流濺雪不特裂帛湖也 游業

玉泉山根碎石泉涌去山不數武裂帛湖也泉迸湖底

狀如裂帛渙然合于湖湖方數丈水澄以鮮漾沙金色

過溪曰望湖亭宣廟駐蹕今圯其南上下華嚴寺嘉靖

庚戌寺燬焉存者二洞華嚴七真洞壁刻元耶律氏詞

紆而西觀音菴洞曰呂公洞昔呂仙憇此去而洞名也

又北金山寺寺破但未廢爾寺有洞曰七寶徑寺登乎

山山舊有芙蓉殿金章宗行宮也昭化寺元世祖建也

帝京景物畧

玉泉在京城西三十里西山之麓有石洞泉自中而出

洞門刻玉泉二字泉味甘冽上有石巖名呂公洞其上

有芙蓉閣金章宗避暑處其山之陽者泉自下湧鳴

若雜佩泓澄百頃合流而入都城逶迤曲折宛若流虹

戴司成集

玉泉山麓臨水有亭裂帛泉從石根出溢為渠石子鱗

卷二十二

卷二十二

三



鱗了了可見依山瞰泉原為昭化寺今久廢珂雪齋集  
宛平有玉泉山行宮金史地理志

明昌元年八月幸玉泉山六年四月幸玉泉山承安元  
年八月幸玉泉山泰和元年五月幸玉泉山三年三月  
幸玉泉山七年五月幸玉泉山金史章宗紀

至元三年八月郭守敬請開玉泉水以通漕運從之十  
五年十二月禁玉泉山樵采漁弋元史世祖紀

至治元年十二月疏玉泉山河元史英宗紀  
泰定元年八月罷浚玉泉山河役元史泰定帝紀

世祖召見郭守敬而陳水利六事其一中都舊漕河東  
至通州引玉泉水以通舟楫可省雇車錢六萬緡元史  
本傳

文宗幸護國仁王寺遂汎舟玉泉蓋苗進曰今願平不  
登邊隅未靖正當恐懼修省何暇逸游以臨不測之淵  
乎帝嘉納之賜以對衣上尊卽卜還宮元史本傳

吳師道遊西山詩序三月十七日金華吳師道正傳  
晉寧張翥仲舉襄城趙璉伯器臨川吳當伯尚河東

王雍元肅同遊西山玉泉護聖寺遂至香山既歸各  
賦詩以紀實先是護聖主僧月潭師款客甚勤留之  
不果則約以再遊又約以詩為寄未及寄則又屢督  
趣之於是哀寫為卷納之山中四人者推其為最長  
故其詩居首而又復叙其畧焉吁吾曹東南西北之  
人幸而會于京師佳時勝集徜徉名山水間既愜于  
心師超然方外而獨惓惓焉其高致尤可愛而仰也

秋風揚鈴客興未已又將往踐前約然桑下三宿之  
戀或法所不可師其有以語我乎 吳禮部集

三月十八日張仲舉趙伯器吳伯尚王元肅同遊西  
山玉泉遂至香山詩蕭清門外春草青背城曼衍趨  
如垌西山曉晴出蒼翠高下不斷如連屏道傍巨冢  
烏鳥噪寒食野祭遺羶腥深路積雪泥在緩控瘦  
馬仍矜嶮行行山近寺始見半空碧瓦浮晶熒先朝  
營構天下冠千門萬戶侔宮庭寺前對峙兩飛閣金  
鋪射日開朱櫺截流累石作平地修梁雄跨相緯經  
平臺當前白玉座刻鏤精巧多殊形常時御舟此遊  
幸清簫妙管魚龍聽泐堤萬柳着新綠未見蒲葦彌  
旭汀鳧飛鷺起渺空濶使我清思凌滄溟遊船兩兩

棹歌起亦有公子攜娉婷主僧說法據高座撞鐘擊  
鼓聲<sub>々</sub>霆欣然肅客導周歷<sub>々</sub>瞻幻怪何神靈後園  
小殿翳花木繡幃香閣猶深扁坐陪方丈談<sub>々</sub>疊疊伊  
蒲清供分餘馨出門暄風掠人面前後復歷峴與<sub>々</sub>涇  
泉乾土勁草樹少祇有廟塔高亭亭香山蘭若金源  
舊猶餘大定殘碑銘長松老檜見未有澗水遶屋鳴  
清泠攀危陟峻劇喘汗却下迅走誰能停班荆列坐  
杏花底持觴受此香雪零日規漸隱半峯側酒行不  
盡雙玉瓶衆賓未醉有餘興惟我却飲嗟獨醒疾  
信馬路已熟遙見樓堞塵冥冥歸來門巷未深黑春  
雲黯黯明踈星廣文官况淡於水矧復聚散如浮萍  
玉泉頗恨不少住客意更擬同揚舲明朝清遊墮夢

境擁書却坐槐陰廳同上

陳孚玉泉垂虹詩雪波碧擁千崖高落花點點浮寒  
瑤日斜忽有五采氣飛上太空橫作橋古寺殘鐘塔  
鈴語回首前村猶急雨輕綃欲剪一幅秋又逐西風  
過南浦觀光集

胡廣玉泉山作玉泉之山下出泉泉流樹色鏡中懸  
却帶西湖連內苑直下通津先百川微風時動碧波  
蹙明月夜映清光圓此中曾炤古人影故碣記得金  
元年胡文穆公集

鄒緝和韻嶂霧巖雲湧玉泉長流未似瀑流懸聲驚  
素練鳴秋壑光訝晴虹飲碧川飛沫拂林空翠濕跳  
波濺石碎珠圓傳聞絕頂芙蓉殿猶記明昌避暑年

素齋集

李東陽玉泉道中作日照山山紫翠生雨餘秋色更  
分明蜃樓出霧東浮海維堞連雲北繞城舊識郵亭  
猶問路漸多僧寺不知名十年幾度登臨約未盡平  
生吏隱情懷麓堂集

劉大夏玉泉道中作晚來聯騎踏晴沙風景蒼蒼一  
望遐幾處白雲前代寺數村流水野人家鶯啼別墅  
春猶在馬到西山日未斜回首不知歸路遠九重宮  
殿隔烟霞東山集

吳寬飲玉泉作龍脣噴薄淨無腥純浸西南萬疊青  
地底洞名疑小有江南泉品類中泠御厨絡繹馳銀  
甕僧寺分明枕玉屏曾是宣皇臨幸處遊人誰復上

高亭 匏翁家藏集

何景明玉泉詩行遊金口寺坐愛玉泉名雲去隨龍  
女風來動石鯨入宮朝太液穿苑象昆明却望天河  
水迢迢萬古情 大復山人集

李濂玉泉山詩章宗避暑玉泉山宮女隨鑾到此間  
昔日翠華歌舞地於今猶見五雲還 嵩渚集

廖道南玉泉亭作偶來池上酌暫謝區中緣水濶雙  
飛鳥林踈獨抱蟬披雲穿紫竹聽雨落紅蓮終日石  
梁坐相看意惘然 元素集

朱曰藩玉泉寺小山詩笑指蓬萊石春桃幾樹花仙  
潭馴白鹿童子戲金沙一榻居士室三車長者家憑  
君磨素壁重過賦青霞 二帶閣集

何棟玉泉詩鬼斧何年鑿仙源此日看濺珠翻石溜  
拂鏡漾晴瀾鸚鵡春塘淨雲霞夕影寒分流入內苑  
故作九龍盤 太華集

高應冕游玉泉寺詩西山玉泉寺蒼翠橫寥廓寒流  
迴清池落水何蕭索青峯映蓮宇白雲度松閣攜壺  
歷翠微披襟憇幽壑感此高秋景寧忘朋聚樂長吟  
石上風緬懷雲中鶴何當一來遊遂我芙蓉約 高光  
州集

歐大任同黎祕書游西山經玉泉山池亭望西湖詩  
並馬今朝路西行訪石經山泉浮鉢綠湖草映袍青  
積玉迷春爛飛花入暮亭十年江上客烟雨憶揚舲  
歐虞部集

黎民表游西山玉泉池詩圓亭知異脉方折紀靈蹤  
濯月金規滿含風石鏡融平湖隱作浪曲澗瀉爲淙

一入昆明去千秋照綺櫺

瑤石集

胡應麟游玉泉詩殿隱芙蓉外亭開薜荔中  
山光寒帶雨湖色淨連宮作賦攜詞客行歌伴釣翁  
夕陽沙

浦晚鳧雁起秋風

少室山房集

崇真觀在玉泉山下觀外小澗環流橋壞循岸西清淺  
處以渡其前累石爲臺臺下甃方池池上有斗室口靈

淵齋

錢文肅公集

循玉泉而西二里爲觀音寺寺依山入門有洞深廣二  
尋出洞拾級而上亭曰望湖山後有小洞可坐二人洞  
北有大洞方濶兩傍石榻可坐傍刻字曰玉泉觀音洞

剔蘚辨之下三字乃後人續刻名相傳金章宗避暑於  
此上有芙蓉殿漫不可尋但荒榛碧瓦而已出洞尋舊  
路而西有廢菴又一洞亦曰觀音洞山麓有呂公洞

前  
溪集

補陀寺在玉泉山半門內即呂公洞寺右躋石級上望  
湖亭

南濠集

玉泉山有呂公巖下臨一潭遺丈餘山上有看花臺卷  
幔樓

燕都游覽志

呂洞賓名崑唐呂渭之後五代間從鍾離權得道與權  
更出没人間權不甚多而洞賓踪跡數見好道者每以  
爲口實

蒙齋筆談

程敏政呂公洞詩石洞知何代門當玉澗灣潮音疑

可聽仙駕杳難攀  
暗穴深通海危亭  
上據山吟身貪  
縱步遙帶夕陽還

筆墩集

李濂游呂公洞詩窈窕呂公洞  
逶迤玉泉側澗流緬  
松門石梁亘雲壁始入日匿影  
徐轉天漏白靈窟度  
縈迴細徑緣歎仄杖邊霏漸冰  
衣上霰微積紫芝敷  
異芬瑤草弄明色窮猿倒窺人  
仙氣飛避客遙遙薛  
蘿陰嫋嫋蒼翠夕金膏欣可餐  
石髓艱難識意慙諸  
妄遺神超萬緣釋伊予事沉冥  
夙負山水癖曩聞呂  
仙名茲覽修真跡丹爐滅灰燼  
石牀日苔蝕一遊洞  
庭波千載杳消息珪組知爾忘  
煙霞恣所適私陋名  
利心躡躡竟何益

嵩渚集

華嚴寺左有洞曰翠華有中石牀  
可憇息題詠頗多苔

清不可讀又有石洞在山腰若鼠穴  
寺北石壁泉出其下作裂帛聲故名  
裂帛泉有亭可望西湖故名望湖亭

華嚴堂集

華嚴寺有小洞三俱幽邃屋後石壁  
下一池其形如壺土人呼爲捏鉢湖

長安可游記

上華嚴寺下華嚴寺俱正統間建其  
額英廟勅賜寺有二洞一在山腰一  
在殿後曰七真洞或云卽翠華洞洞  
中石壁鐫元耶律丞相一詞夏相國  
言和之亦刻于壁

長安客話

華嚴寺鑿山爲洞下上凡五處深者  
二三十步淺者十餘尺

文義集

耶律楚材鷓鴣天詞花界傾頽事已  
遷浩歌遙望意

下書眉

卷二十二

三

茫然江山王氣空千劫桃李春風又一年橫翠嶂  
寒烟野花平碧忽啼鶻不知何限人間夢併觸沉思  
到酒邊 湛然居士集

復言和詞人世滄桑有變遷靈巖玉洞自巋然朝衣  
幾共遊山日佛界仍存刻石年嗟歲月惜風煙等閒  
花發又啼鶻只將彩筆題僧壁玉帶長留向日邊 桂洲集

倪岳遊玉泉華嚴寺詩門外寒流浸碧虛玉泉山上  
老僧居芙蓉雲鎖前朝殿耶律詩存古洞書曲澗正  
當虹飲處好山相對雨晴初笑 石磴臨高頂浩蕩天風襲翠裾 青巖集

李夢陽翠華巖詩洞劉 律詞具名翠華巖仍視聳

觀閣仰面攢松杉厥維何王代鬼斧開巖崑情氣久  
削薄烟嵐鬱相攬屢憇驗足繭獨往悲情凡入蘿畏  
石墜轉嶠驚日銜飄飄萬里風吹我秋衣衫放迹慕  
康樂入道懷賀監載思武陵避愈悵桃花畧去住亦  
由人極目江上帆 空同集

杭淮西山呂公洞詩我尋呂公洞水邊春駐鞍側身  
入地底偏側頗礙冠導燈如星明墮石訝劍攢魚貫  
緣曲折忽俯千丈湍却步前未敢下有龍結蟠腥風  
起昏黑颯爽肌粟寒五年客京華茲辰亦奇觀 雙溪集

皇甫濂玉泉山寺七真洞詩高閣重巖合層臺 雙溪集  
幽風殘芝洞日雲落礫泉秋貝葉看深誦金沙歷晚

遊七真懷秘躅彷彿在山丘

何棟華嚴寺詩尋山入淨苑撫石眺芳洲巖樹雲邊

盡春泉雨外流花深時見鹿荷密欲藏鷗夙昔懷丘

壑將因叢桂留大華集

華嚴寺後有竇深不可測其上為望湖亭見西湖明如

半月河雪齋集

望湖亭不作于龍潭而作於裂帛湖上真無識也袁中

郎集

自華嚴寺西度三石橋門臨水曰金山寺寺西北皆山

也大復山房集

金山寺欄道窄僅可徒步既至寺抵一笑菴觀龍洞

洞方廣不及尋丈旁有石穴深宵莫測錢文肅公集

金山寺西麓盡處也游業

華嚴右半里為金山寺山有玉龍洞洞出泉甃石為階

渠引水伏流約五里入西湖名曰龍泉望湖亭建其上

長安客話

李夢陽望湖亭集句與容提壺上翠微千家山郭靜

朝暉平沙渺渺來人遠黃鳥時兼白鳥飛又曉行不

厭湖上山別有天地非人間安得移家此中老白雲

長在水潺潺空同集

何景明望湖亭詩獨上湖亭望霜空萬里明檻疑天

上立槎是斗邊行雲霧迷山殿芙蓉暗水城先朝四

百寺秋日遍題名大復山人集

張治望湖亭詩望湖亭下水如天曾記宣皇賜幸年



王輦不來鳧雁冷一湖楊柳鎖春烟 張文肅公集

文徵明望湖亭詩寺前楊柳綠陰濃檻外晴湖白映

空客子長途嘶倦馬夕陽高閣送飛鴻卽看柳色浮

天際已覺扁舟落掌中三月燕南花滿地春光都在

五雲東 甫田集

王穉登望湖亭詩亭邊楊柳水邊花落日行人正憶

家不及江南湖上寺木蘭舟裏載琵琶 燕市集

王樵望湖亭詩平疇門外春雨遠寺山邊夕陽柳護

溪橋輦路水肥穉稔江鄉 方麓居士集

裂帛泉從玉泉山根出溢而為渠依山瞰泉為昭化寺

基今寺已廢吳隱為史園正泉所出也 珂雪齋稿

水更深碧 長安可游記

朱國祚裂帛湖上作水淨一匹練山圍六扇屏春風

纔幾日藥甲已先青 介石齋集

日下舊聞卷二十二終

白菜甲

水更

木更

日下舊聞卷二十二補遺

郊坰四

宣德年鑄薰鑪海內所珍今多贗物真者百之一耳市者一鑪索數十金卒難得其佳者慈壽寺西有元福宮文昌祠前銅鑄一爐傳是宣德年所造游人以手摩挲銅質呈露其色甚瑩驗鑪之質亦可辨薰鑪之真贗矣改過齋雜記

燕中不乏名勝大抵皆貴璫墳院位置一律殊不雅觀惟武清侯海淀別業引西山之泉滙為巨浸繚垣約十里水居其半疊石為山巖洞幽邃可運舟跨以雙橋堤傍俱植花果牡丹以千計芍藥以萬計京國第一名園也澤農吟藁

左思魏都賦有掘鯉之淀或云卽狐狸淀廣韻淀泊屬  
韻會淺泉也今京師有南淀北淀近畿則有方淀三角  
淀大淀小淀清淀澗淀勞淀獲淀疇淀延芳淀小蘭淀  
大蘭淀得勝淀高橋淀金盞兒淀葦淀大蓮花淀小蓮  
花淀浮鷄淀白羊淀黑羊淀黃龍淀鷺巢淀牛橫淀火  
燒淀下光淀大光淀糧料淀破船淀水紋淀百水淀五  
官淀棗池淀廣平淀陳人淀武益淀洛陽淀齊女淀邊  
吳淀燕丹淀趙襄子淀孟宗淀其他不能悉記凡九十  
九淀按說文無淀字傳寫者或作洵或作澱或作墊皆  
非 風庭歸業錄

西湖土人稱之必曰西湖景 湖紀

西湖北岸長堤五六里堤柳多合抱龍王廟據其中對

視波光十里空灑際天諸峯在眉睫間絕無丹青脂粉  
氣 山行雜紀

北京功德寺後宮像設工而麗僧云正統時張太后嘗  
幸此三宿乃返英宗尚幼從之遊宮殿別寢皆具太監  
王振以爲后妃遊幸佛寺非盛典也乃密造此佛旣成  
請英宗進言于太后曰母后大德子無以報已命裝佛  
一堂請致功德寺後宮以酬厚恩太后大喜許之復命  
中書舍人寫金字經置東西房自是太后以佛及經在  
不可就寢遂不復出幸 椰那漫鈔

袁袞功德寺詩宣皇臨御日此地數遊觀花下停雙  
輦松間拜百官雲長依寶座月自照瑤壇寂寞橋陵  
路惟餘古木看 袁永之集

繞功德寺後過金山口見一高峯峯頂有紺殿角急邊  
之行數里荒寂絕無僧舍路多礫石而所見紺殿已不  
可卽矣僅見一谷口頗幽邃騎不能上乃下馬步上坡  
三里許稍南度大壑又三里許朱門煥然上書寶藏精  
藍入門又二里許披宿莽陳根而行上石磴爲天王殿  
再百步上石磴爲寶藏殿殿右石棧凡五轉每轉可二  
丈餘棧盡爲臺臺有觀音殿二十里外所見紺殿角卽  
此也寺係正統四年爲西域僧道深建初名蒼雪庵後  
勅賜今額 山行雜紀

山中諸泉圓通寺門水第一寶藏次之 同上

甕山下東南數十步舊有耶律丞相祠崇禎中尚存公  
及夫人二石像端坐陌頭少前二翁仲其一首毀相傳

居人夜見有光疑其怪而鑿也後一高阜則公墓迄今  
三十年斷隴已平問之土人鮮有知公墓者墓西半里  
圓靜寺僧猶能言其處 青箱堂集

甕山前有仁慈庵入門三百步兩傍椿樹夾之登石磴  
二十級有堂三楹兩廡翼之西廡前爲樓菴左爲圓靜  
寺寺門度石橋大道通湖堤門內半里許從左小徑登  
臺精藍十餘室之西殿三楹左右精舍一間據山面湖  
山行雜紀

慈恩寺在青龍橋側萬曆中勅建 順天府志

趙志皇勅賜護國慈恩寺碑記畧慈恩寺在西直門  
外二十五里青龍橋聖母出內帑遣慈寧宮近侍御  
馬監太監陳儒督造經始于萬曆癸巳五月落成于

甲午九月寺外爲山門前爲天王殿傍翼以鐘鼓樓  
中爲大通智勝寶殿左右列伽藍祖師二小殿大殿  
後爲藏經閣經凡六百七十八函有大士像繚以周  
垣僧寮方丈廊廡庖廩畢具一歲而工告成

六虛堂

藁

青龍橋南里許爲西方菴東望據湖梵宇雖不雄偉而  
極精嚴稍南爲三元寺甚隘而頗饒水木之勝度三元  
寺卽功德寺矣

山行雜紀

玉泉頗類趵突但趵突湧水有三玉泉止一穴趵突高  
三尺餘玉泉止尺許斯不及爾

寄園寄所寄錄

黃清老玉泉山懷友作遠水平林翠繞城秋來風雨  
動離情玉泉千尺梧桐樹月下蕭蕭落葉聲

樵川集

吳子高次韻馬伯庸遊玉泉山作飛絮晴絲絡馬頭  
春風長記侍宸遊牙檣映日開龍艦天樂連雲上翠  
樓楊柳盡隨堤北偃芙蓉不礙水東流遙憐玉輦時  
巡處千里風烟紫塞秋

文翰類選

玉泉山右名瓦窰頭西向有隆佑菴僅數廡有垂柳內  
詩名花楚楚可觀

山行雜紀

全山口度嶺至冷泉村道傍皆水田行二里許曰泰州  
務其後畫眉山上有龍王祠龍湫圍廣十畝水從石罅  
出從東垣下溢田間潺潺有聲

同上

元時杏花齊化門外最繁東岳廟石臺羣公賦詩張讌  
傳爲盛事葛邏祿易之詩云上東門外杏花開千樹紅  
雲遶石臺最憶金章虞閣老白頭騎馬看花來至明城

東花事衰郊西漸盛萬曆後摩訶菴杏花多至千株吾鄉朱太傅養醇詩云摩訶菴外袖吟鞭繁杏春開十里田曾與村翁舊相識看花不費酒家錢承平之日翰苑風後先一致也 山齋詩話

清華園前後重湖一望漾渺在都下為名園第一若以水論江淮以北亦當第一也 明水軒日記

出阜城門西行三里許有報恩寺又西三里靈佑觀又西為廣福寺又西為嘉祥觀又西為元應觀入八里莊堡為摩訶菴又西為永慶寺又西為慈壽寺又西為元福宮嘉祥觀多松入門二株尤秀潤摩訶菴前殿有碑二碑文左為鉛山費尚書家撰右為華亭孫尚書承恩撰俱嘉靖二十七年立殿後右廂有竹一叢院中雜蒔

草花堂懸萬物育墨跡三字上用恭穆獻皇帝睿筆墮下有嘉靖年製小印堂後松二株高出殿脊其後則中官趙政墓也元福宮建于正德五年至天啟五年重修中有蒼松四株最奇古後殿三清六真像皆范銅為之配殿文昌與夾侍童子亦銅像旁鑄一螺銅質光潤絕似宣德鍍金薰鑪色殿前後凡四碑一仆二為人磨去止存中書舍人袁志學一碑崇禎元年所立也 人海記費案摩訶菴碑記畧摩訶菴者乾清宮管事司設監太監趙政所創也在宛平縣香山鄉八里莊正殿一左右配殿廊廡方丈旁舍凡九十經始於嘉靖二十五年正月竣事于明年閏九月菴之地為畝三十園圃之地為畝二頃五十餘 費文通公集

袁志學重修元福宮碑記畧國家庖爨柴薪產自馬  
鞍山八里莊爲中道而無停宿之所太監王文政用  
價五千兩贖得武清侯地三十頃東至摩訶菴南至  
釣魚臺西至兩家店北至張花村而元福宮在其內  
於是建立筏柴停宿公廨元福宮重加修葺焉袁舍  
人集

由三虎橋西行里許爲天禧昌運宮初名混元靈應宮  
正德六年司禮監太監張永請于朝勅建至萬曆四十  
四年重修增置垣墉二百餘丈門廡百餘間督修者太  
監林潮也工竣更今名殿宇凡七重松栝二十三株柏  
二十株大皆合圍夾以雜樹上枝干霄下陰蔽地有二  
碑築亭覆之一爲勅建碑一爲大學士李東陽撰文楊

廷和書英國公張懋篆額俱正德七年立

一碑萬曆

中立副使劉效祖撰文宮之後則張永墓在焉

倚晴閣

雜抄

李東陽混元靈應宮碑畧國朝之制道院多以觀名  
其名宮者特爲隆重在都城者若朝天靈濟顯靈延  
福而郊關之外惟昭應及此爾懷麓堂集

菴土人目爲松林今松無復存者萬曆中所建也  
後有藏經閣可眺西山東北有果園園中有亭曰衆芳  
亭北砌石爲流觴曲水其東有閣曰明遠春月桃杏雜  
發登閣望之不異錦城花海也人海記

宛平縣京西鄉馮家里舊有太一集仙觀元元貞元年  
以其地畀純一真人口全祐有栗五千株全祐相栗林

隙地重岡環抱下有寒泉旁地衍沃可引灌溉構正殿  
三楹翼以兩廡繚以石垣王惲爲之作記大德元年刻  
于石 戴斗夜談

王惲重游玉泉詩峰頭亂石闐嵯呀水底浮光浸碧  
霞絕似蘇門山下路惜無脩竹與梅花 秋澗集

海淀清華園戚畹李侯之別業也去都門西北十里湖  
水自西山流入御溝人無得而游焉淀之水濫觴一勺  
都人米仲詔濬之築爲勺園李乃構園于上流而工制  
有加米顏之曰清華初至見茅屋數間入重門境始大  
池中金鱗長至五尺別院二邃麗各極其致爲樓百尺  
對山瞰湖堤柳長二十里亭曰花聚芙蓉繞亭五六月  
見花不見葉也池東百步置斷石在紋五色狹者尺許

修者百丈西折爲閣爲飛橋爲山洞西北爲水蜀壘石  
以激水其形如簾其聲如瀑禽魚花木之盛南中無以  
過也雪後聯木爲水船上施軒幕圍籬其中引觴割炙  
以一二十人挽船走冰上若飛視雪如銀浪放乎中流  
令人襟袂凌越未知瑤池玉宇又何如爾 譽言譚

玉泉山在西山大功德寺西數百步山之北麓鑿石爲  
螭頭泉自口出滌而爲池瑩徹照映其水甘潔上品也  
水晶







